


BUPAKI FA LIWATE

 Lu si ka inamisa kale litho zaluna kwa tapelo, Ni tabela kubala amañwi a Manzwi a Mulimu. Ni tabela kubalanga Linzwi la Hae kamita; kakuli manzwi aka akona kupalelwa, ki a mutu, kono Linzwi la Hae halikoni kupalelwa. Mi mina mutebela kulatelela palo ni mañolo, ni zeñwi cwalo, halu baleñi mwa Mateu kauhanyo ya 14, busihu boo, kukalela ka timana ya 22.

Honafo Jesu a hapeleza balutiwa ba hae kuli ba longane mwa sisepe, ba i tangete ku ya mwa buse, yena ha sa kutisa buñata.

Mi amano kutisa buñata, akambamela fa lilundu ku yo lapela kwatuko: mi haseili. . . manzibwana, na li fateni anosi.

Kono sisepe sona ne si li fa hali a liwate, si zukuzwa ki mandinda: kakuli moya no si hanisa.

Kono ka nako ya mikombwe ha ilila Jesu ataha ku bona, inza zamaya fa mezi a liwate.

Mi balutiwa ha ba mubona a zamaya fa liwate, ba saba, bali, Ki silumba; mi ba huwa ka kusaba.

Kono Jesu apakisa kubulela ni bona, ali, Mu tiye lipilu; ki Na; mu si ke mwa saba.

² Ha lu inamiseñi litho zaluna kwa tapelo. Litho za luna ni lipilu ha li inami cwalo fapila Mulimu, kana kuna ni kupo mwa muyaho, busihu boo, ye mutabela ku zibahalisa ku Mulimu, ka kunanula mazoho a mina, mi mu hupulwe mwa tapelo? Mulena a mi talime, a lu utwele butuku ni makeke.

³ Ndata luna Yakwa Lihalimu, lu taha cwale Fapila Hao, ka nzila ni ka Libizo la Mulena Jesu. Ka kukuziba, ka sepiso ye fuyozwi, ya Na lu sepisize, kuli ha lu ta “kupa sika” ka Libizo la Hae, kuti Wena u ka lufa sona. Lu itumezi luli ka se. Manzwi hakoni kubulela mo luikutwela ka zona, ni sepiso ye lunani, yakuli Wa lu teezeza cwale.

⁴ U boni mazoho ani, Mulena. U ziba se ba tokwile. Wena u ziba linto kamukana, ukona linto kamukana, Mulimu ya sa feli, mi lu ziba kuli Wena u ziba lipilu za sicaba. No ziba milelo yaluna. Mane kale koo lu si ka bupywa kale, No ziba mulelo kaufela o ne lukaba ni ona, kakuli Wena u ya sa feli.

⁵ Mi lwa lapela, Muena, ka hola ye, sina litakazo zaluna hanze lifita ku Wena, talima fafasi uli kwa Lihalimu, Mulena, mi unge likupo zaluna kwa Pilu ya Hao Tota, Mulena, mi lu alabe kuya ka bufumu bwa Hao mwa Kanya. Fa ku luna litakazo za pilu zaluna, lu sepa kuli ki Tato ya Hao. Mi lu ziba kuli ki tabo yende ya Ha kuli ueze tato ya Hao.

⁶ Lufe kusuluha kokutuna kwa Pata ya Hao, busihu cwana, hape Mulena. Folisa bakuli. Pilisa baba latehile, zusa bona baba shwezi mwa sibi ni lifoso, mi batise kwa Bupilo bobunca, busihu cwana. Mi lubone Jesu. Lwa kupa ka Libizo la Hae. Amen.

⁷ Mwa kona kuina. Mu lu swalele kuli halukwanisi kukopanya sicaba sesiñata, bakeñisa bunyinyani bwa sibaka mwa kuipa. Kono, kakuba kuli ki busihu bwa pili, ba bulezi kuli nebana ni kuhanela batu babañata, kacwalo lu swabile luli ka seo. Mi Muzwale Grant nasina fela sibaka sesiñwi sa muyaho, kamba, ku. . . Ni lumela kuli ki kwa nzohoto kona ko aka shenyiseza muyaho woo. Muzwale yomunde, nde kacenu na ni buza haiba Ni ka eza taba ye kubanga mwaha ni mwaha, ku kutela hape kwa Dallas, kwa keleke ya hae. Memo yetuna sina yeo, mwa hola ye, fo minyako ha i kwaliwa kapili, mi kipeto muuna yo ubata kuli ni bange kwanu mwaha ni mwaha, cwalo. Na itumela ka seo.

⁸ Ne ni bile ni nako yende ya kopano ni bona kakusasana cwana, ni Muzwale Gordon Lindsay ni buñata bwa bona. Muzwale Pearry Green, yena mutusi wa mukopano otaha kwani kwa Beaumont, uinzi kwa mulaho wa ka fa busihu boo. Mi buñata, balikani baluna, Muzwale Don ni musala hae. Lu tabile hahulu ka kuba ni bona mo. Mulena a ba fuyole.

⁹ Cwale, busihu boo, fela. . . Ni bile ni lika kueza Mañusa aka kuba abunolo mo ku konahalela kaufela, ili kuli neba mwanana wakona ku li utwisisa.

¹⁰ Kamuso musihali ki sebelezo ya evangeli, mi Ni lakaza kuli kaufela muzwele teñi.

¹¹ Cwale haiba mu na ni lisebelezo kwa likeleke zamina, kupalañi, mu—mu muine ko mu—ko mu swanela kuba. Ha lulati kuli neba alimuñwi azwe kwa likeleke zabona, kwa. . . Mi cwale haiba wa kula mi ubata kutaha ku to lapelelwa, mi keleke ya henu ina ni sebelezo kamuso musihali, ambola ku mulisana wa hao ka zona, kuli asike anahana ze maswe, mwa ziba. Mu tuhele azibe kuli luteni mo ka kutwano, kwa—kwa kutusa Mubili wa Jesu Krete kakutala osweli kuzamaya ka buenyi mo mwa Dallas ni libaka zeñwi.

¹² Kacwalo, kamuso musihali, Ni nahana kuli, ka tu-seti, Ni lukela kubulela fa Liñusa la evangeli. Mi cwale lu ka lapelela batu kaufela babakula, lunge makadi a litapelo ni lika zeñwi ze ne siyezi mwahala sunda, ni ku ba lapelela kaufela kamuso.

¹³ Cwale tuto yaka busihu boo kuswana sina papali nyana, ka mizuzu nyana fela. Mi Ni ka lika kuba ni babañata busihu bo mo Ni konela, ka za kulapelela bakuli. Palo yaka ki kuli, “mu si ke mwa saba, ki Na,” Jesu wa bulela. Tuto ya ka kikuli: *Bupaki Fa Liwate*.

¹⁴ Ne iswanela kuba ka manzibwana cwalo, lizazi ne li ya li likela taba ye ha i ezahala, mi cwale mwendi neli lizazi le li cisa inge mo inezi kwanu.

15 Sifukiso sa moya sishwile, mi baswelli ba si lukisa. Kona libaka ha Ni cincize taba yaka kuzwa kwani, se ne Ni ka bulela, kacwalo Na kona kuakufa ka yona, kuli musike mwa ina mo sina cwalo.

16 Muyambi yomutuna yo, kasamulaho wa kubona za na sweli musihali wani, na bona Jesu mwa bulumiwa bwa Hae bobutuna.

17 Ne ni ka tabela kupila mwa lizazi lani, ku latelela Yena. Kono, mwa ziba, Ni tabile Ni sa na ni lithonolo la kueza zeswana, ku Mu bona ha eza lika. Mi ki nto yende ku Mu bona kacenu kufita mo ne kuinezi linako zani. Nina ni tumelo yeñata ku Yena cwale, mi nakona kuba ni tumelo yeñata cwale kufuta yene Ni kaba ni yona nako yani, kakuli lubile ni myaha ye likiti zepeli yebonisa kuli Evangeli i lukile. Mi kasamuaho wa myaha ye likiti zepeli, U sa pila, ueza zeswa sina mwa Na eza linako zani, kacwalo luna ni sepišo yetuna mi ni mutomo kwa tumelo cwale kufita yene banani ka nako yani.

18 Kakuli, Na li fela Mutu ya na zamaya kwa ni kwa inza bulela kuli—kuli Na lumilwe ki Mulimu mi na li Mwan'a Mulimu, mi ni kuli Mulimu na i paka Linzwi la Hae la sepišo la lizazi lani, ka Yena, mi ne ba na ni mukwa wa ku kakanya ka lona. Baituti ba zabulapeli, neli bona! Mi mwa lemuha kuli neli nto yemaswe, neli yemaswe luli, kakuli baituti ba za bulapeli ne ba ka lumela Kuli kambe Mulimu na si ka fougaza meto abona. Bibeke ibulezi ona cwalo.

19 Mi kana mwa ziba kuli Na sepišize kuli Uka fougaza meto abona hape kacenu, kuli ne ba si ka Li bona? Ne bakaba “baitati, bainuneki, ba balata minyaka hahulu kufita kulata Mulimu, ikaba lishembi, baba seba batu ka buhata, babasina buiswalo, ba ba toya batu babande; ba ba eza mukwa wa bulumeli, kono balatula Mata a teni.” Ona cwalo fela ki sepišo yekuta hape. Mi hamukoni mane kuba ka buino busili kwanda ku ba utwela makeke, mi meto a bona kakuba bubofu kwa lizazi le. Ka Mañolo akuli Mulimu u sepišize ze ka ezahala mwa lizazi le, mwa hola ye, mi lugalimezi ku lona ni ku libelela. Mi cwale sicaba sa talima, ni kunyunga litho zabona ni kuya kusili, bali, “Ha Ni liboni.” Ki nto yemaswe, kono niteñi Mañolo ana ni kutalelezwa. Ku lukela kuba ona cwalo.

20 Kacwalo balutiwa ba ne ba ketilwe ki Mulimu. Kana mulemuhile, Jesu a ba bulelela kuli, “Kusikaba kale mutomo wa lifasi,” Na ba ketile, mi ne ba lukiselizwe kuba peu ya Mulimu. Kona libaka matata ha na taha, mi sicaba ne si bonahala inge kuli ne ba beile Jesu mwa lilulu, fa puzo, nekusina puzo ku bona. Ne ba sa utwisisi, kono ne ba sa tabeli kuziba taba isili kwanda Yena. “Ki wena fela yana ni Linzwi la Bupilo.” Mi ne ba itamile kupila ni Lona, kakuli ne ba lukiselizwe kwa ofisi yani.

21 Mi kona mo kuinezi kacenu, kuli baana ni basali, baba lukiselizwe kwa Bupilo Bobusafeli, ba ka taha wa Bupilo

Bobusafeli. “Kaufela bao Ndate a Ni file ba ka taha ku Na.” Leo kona Linzwi la Hae, mi leo halikoni kupalelwa. Ki—ki Linzwi la Mulimu.

²² Mi lubona balutiwa ba cwale, be ne ba na ni mukopano omutuna zazi lani, kwande mwa masimu amatuna kwatuko a lilundu. Mi Jesu aba bulelela, “Cwale amu silele mwabuse bwa litawe, muitange kwapili Aka.” Mi Na ya fa lilundu, anosi, ku yo lapela. Mi balutiwa ba, kasamulaho wa kukatana balikani, Na kona fela kunahana mo ne ba i ku twezi.

²³ Kakuli, ku yo katana balikani, mi hape ni ku kauhana ni balikani; nako yakuli se mukala kutwaelana, kipeto mu bulela kuli siyala foo. Mi zeo li ni utwisanga hahulu pilu butuku kamita, mwahala linaha, kupotoloha lifasi, nibile ni kopana ni balikani mi ni ku ba siya, ka kuziba kuli kuna ni babañata bo si ke wa bona hape kufitela mu kopana kwa Katulo. Ki taba ye utwisa matomola pilu.

²⁴ Na kona kunahana fela sisepe, ni si—si silabo sateni ha si kashezwa kwa libaka. Mi mwendi neli Simoni Pitrosi, ni mazoho amtuna a tiile ni maheta, a na kashize sisepe ni ku si kasheza mwa liwate. Mi kaufela ne basweli ku ba sialisa ka ka mazoho fa likamba. Mi nebasweli kuhuwa, “Mu yo kuta hape mu lu tiseze Muluti! Mi mutahe lu to ba ni ancafazo yeñwi; lu fuyozwi hahulu kacenu!” Ni balikani ba banca inze ba sialisa. Mi akwelisa balutiwa babañwi kaufela, mi aina fakaufi mwendi fakaufi ni munyana hae, Andreasi, mi ba nanula lilabo.

²⁵ Li—li lisepe cwale ne li zamaiswa ki moya kamba lilabo ze ne fuluhiwa. Mi mwendi ne ba inzi bababeli mwa sisepe, bababeli kwa matuko, mi nebana ni . . . kamba bababeli mwa sipula, nitaluse, mwendi ne si na ni lilabo ze sikisi kamba eiti. Ne ba fuluha kapili, mi ka mukwa ocwalo nebakona kubeya sisepe hande ha ne kutaha mandinda. Mi, moya ha ne ufuka hande, neba fuluha ka kuiketa, ni kufuluha.

²⁶ Ne i swanela kuba musihali o cisa, kuya ka mo kubonahalela mwa Mañolo kezahalo ye i si ka ezahala kale, mi kacwalo mwendi neli lizazi lelinde, leli futumala, mushali ocisa. Lizazi ne li likela. Mi bona, hane basweli kufuluha cwalo, mi ba tuhela fokuñwi ni kusiyalisa sicaba ka mazoho, “Lusepa ku mi bona hape nako yeñwi,” ha ne ba fita fahala liwate. Mi lizazi la likela, ni liseli la manzibwana, mi cwale kasamulaho nyana li—li lififi la kwahela.

²⁷ Mi hakulata ne ba fuluha ka kuakufa luli kwa—kwa lilabo, mi wani ki musebezi otata lilabo zebukiti zani ha li cimbekiwa mwa liwate. Mi buñata bwa bona nebali—nebali bayambi, ni baana babatiile, be ne ba twaezi liwate. Mi kacwalo ne ba kulubela Jesu kukena mwa sisepe ni ku ba latelela, kapili fela. Kiñi, ba yo punya kwani, mi hakulata ne se ba ngunguzi

kwa likamba; mufuta wa kufuweka sisepe sa mina, mi ni kukalisa hape.

²⁸ Mwendu Joani yomunyinyani neli yena wapili kukala kubulela, kakuli neli yena mwanana hahulu mwahala bona. Mi mwendi na bulezi kuli, “Ni ikutwa kukatala nyana. Ha lu fuwekeni hanyinyani fela. Lu libelele fa muzuzu, ha lu lukeli kuakufa. Na si ka taha kale, kacwalo mwendi lu libelele hanyinyani ni kuikatulusa kwateni luhohe moya.”

²⁹ Mi ha na inzi fani ni toho ya hae iinami hanyinyani, hakuala kiyena ya na kalisize bupaki. Mi seo kona se Ni bata kubulela fateni. Mwendu ki yena ya na kalile likande pili, mi ali, “Mizwale, hakuna taba ka se ba bulela batu, kamba mutu ubata ku sa lumela, Na ziba hande ka zeo cwale, kuzwa kacenu kuli ha lu lateleli mupumi. Ha lu lateleli mutu wa felafela kono ki Mulimu, kakuli hakuna mutu yakona kueza Za ezize kacenu konji haiba ki Mulimu. Mwa ziba, ha Na ngile mahobe ani ni ku akomauna, ni kufepa likiti ze ketalizoho zani kwani, yeo kona nto yende hahulu ku na. Mwendu ne kubile puzo kufita ni kacenu,” cwale Ni bulela fela bupaki bwa hae mo ne buinezi, “kono ao neli mafelelezo.”

³⁰ Ali, “Na hupula myaha yefitile kwa mulaho. Ne ni pila mwabuse bwa Jordani. Mi Na hupula, kakuba mushimani yomunyinyani, boma ba bande, ba Majuda mo ne ba ni nanulelanga, mwa nako ya musihali, ni kuni inisa fa silupi sa bona ni ku ni cikisa, fande mwa patelo, mezi na sweli kunataka kwa likamba la Jordani. Mi ne ba talimanga kwa lihalaupa, ko ne ku zwile sicaba sa luna ka lihalaupa le. Ne ba ni bulelelanga makande a mwa Bibe. Leliñwi la makande atabisa e Ni hupula, neli la musali wa kwa Shuneme ni mwana hae wa mushimani ha na kulile ni kushwa, mi—mi mupolofita a mu zusa mushimani yani hape kwa bafu. Lani ne libanga likande lelinde.

³¹ “Kono leliñwi la makande atabisa, le ne ba lata hahulu ku ni bulelela, ne ba bulelanga kuli, ‘Cwale, John, u mwanana fela; kono Ni bata kuli uhupulange, haunze u hula, kuli, Jehova yomutuna na tizize sicaba sa hesu kuzwa mwa Egepita, mi lwa taha ka nzila ya lihalaupa mwabuse bwa nuka yani. Mi myaha ye mashumi kaufela, ba zamaya mwa lihalaupa, nekusina sibaka sa kucinca litino, mi nekusina ni sibaka sa kucela lico. Mi Mulimu anelisa sinkwa kuzwa kwa lihalimu, busihu ni busihu, ni kufepa sicaba sa luna mwa lihalaupa lani, kakuli nebali mwa musebezi, wa ku latelela Jehova yomutuna. Mi cwale, zazi leliñwi, Jehova u ka taha mwa mubili fa lifasi fa, mwa mufuta wa Mutu, U ka bizwa Ya tozizwe, ki Mesia.’

³² “Mi na hupula,” na ka bulela kuli, “kakuba fela mushimani, kuli mushimani waka yomunyinyani ngana ya hae mo ne inahanela zeo, ‘Kana Mulimu na ba fepa cwani, ma milioni amabeli ni licika la batu, mwa lihalaupa lani? Na fumani

kai linkwa kaufela?’ Mi Ne ni buzanga boma, ‘Ima, kana Yena, kikuli—kikuli Jehova una ni litofu zetuna mwa kubeseza linkwa mwa mbyumbyulu nji, mi Na besanga linkwa kaufela, ni kumata kutuluka busihu ku litisa fa—fa fafasi, kwa batu, mi mbyumbyulu yetuna ya Jehova itezi fela litofu nji?’ Neba bulelanga kuli, ‘Batili, mwana ke, u sa li mwanana ku utwisisa zeo. Mwabona, Jehova ki Mubupi. Yena hatokwi litofu. U bulelanga fela, mi Linzwi la Hae kona le li eza lika Asabulela fela. Ki Jehova yomutuna, mi A li bulela fela. Mi Mangeloi a li abela sicaba fafasi, kwa batu.’

³³ “Mi kacenu, ha Ni Mu bona inza yemi fani, kana mulemuhile mubonahalelo wa sifateho sa Hae? Nekusina kukakanya mwa munahano wa Hae. Na pahama kwabuse bwa licwe, ni ku Mu talime ha Na ngile buhobe bwani ni ku bu komauna, ni ku butambeka kwa . . . bakutazi ba Hae, luna, ba li abela kwa sicaba. Mi cwale ha Na kutisa lizoho hape, sinkwa sani sa kwana hape kutala. Mi Aeza cwalo linako ze mianda anda, kufitela mañi ni mañi a sa kusi, mi nekuna ni lizuma, zetezi, ze ne siyezi. Ni ziba kuli yo halukeli kuba usili kwanda Jehova, kakuli Na eza sina Jehova mwa na ezeza. Kwanda Jehova fela kiyena yakona kubupa. Mi Na ziba kuli Muuna yani ha ki mupumi. Kuna ni fela Mubupi alimuñwi kihona, mi yo ki Jehova. Mi cwale, mwahala lika kaufela ze Ni boni, yeo ne i ni katulusanga.

³⁴ “Ni bata kuli mu zibe cwale kuli pilu yaka i ipile ka kutala, mi Ni lumela ka kutala kuli Yena ha ki mupolofita wa fela fela. Ki mupolofita, kono mane U fita mupolofita. Yena ha ki usili yali mwatasa kwande a Jehova Mulimu yapila mwahala luna, kakuli Na bupile sinkwa, mi Nana ni mikwa ya Jehova. Kona ha Na bulezi kuli, ‘Ha Ni sa ezi misebezi ya Ndate Luli, konakuli mu si ke mwa Ni lumela; kono haiba Ni eza misebezi Ya Ndate, mi ha mu Ni lumeli, mulumele misebezi, kakuli ipaka yo nili Yena mi ibulela ka yo Nili Yena.’ Nekubonahala inge kuli batu ne ba boni zani, ka bunolo.”

³⁵ Mi Joani na ikolwisisa kuli Na li yena Mesia, Yena yoo Isaya na bulezi kuli, “Lu luna Mwan’a upepilwe, mi Libizo la Hae li kaba Muelezi, Mulena wa Kozo, Mulimu Yamata, Ndate wa Kamitqa.” Mi Joani na kolwa bakenisa sa na boni. Mutangana yani nasweli kukandeka bupaki bwa hae.

³⁶ Ka yona nako yani, Simoni Pitrosi ali, “Kihande, cwale, libelela fa muzuzu. Haiba lu kaba ni mukopano wa bupaki, Ni tabela kuli ni bulele fateni nina. Mwa ziba, Ne ni sweli kukakanya taba yateni kaufela bati, fani Andreasi munyana ka, ya na ile kwa ancafazo ya Joani, yana pakile kuli Mesia na taha mi ki yena ya na ka Muzibahalisa. Mi Ne ni sweli kukakanya hanyinyani za na ka ni bulelela Andreasi, kakuli Ni utwile mifuta kaufela ya makande a Mesia ni lika zeñwi kaufela.

37 “Kono mina mizwale kaufela mwa hupula bondate ba macembele. Libizo la bona neli bo Jonasi. Mi mwa ba hupula, mo ne ba bezi balumeli baba tiile hande. Mo Ni hupule boma ni bondate, ni luna kaufela, hane lu yamba kuli luipilise ka zona, mi ne lu si ka swala neba tapi ya lubandangoti; ne lu tokwa buhobe, ni mo ne lukubamela fafasi kulapela ku Mulimu, ‘Lufe litapi za kacenu, Mulimu, kuli lukone kulekisa litapi zaluna, ni kulifa likoloti za luna, lube ni lico za kuca.’ Ni mo ne luyezi fa liwate, ni mwa liñungwa, ni kubata ku—ku kuliba mañungwa ani.

38 “Mi bondate, Na bona milili yabona ya limbi ha i nata mwa mukokoto, zazi ha ne bainzi fa litusi la mukolo inge ba ambola nina, bali, ‘Simoni, u mwana ke yomuhulu. Mwa ziba, Ni bile ni lumela, Simoni, kuli Ni ka bona Mesia. Sicaba sa hesu si Mu libelezi kuzwa kwa Edeni. Mi lwa ziba hande kuli Wa taha, hakuna taba kamba uka liyeha cwani. Yeo seli myaha ye likiti zene kwa mulaho, mwa bulela. Kono Ni lumela kuli Mesia u ka taha. Mi Mujuda kaufela u lumela kuli u ka bona Mesia mwa lusika lwa hae. Ni sepa ku Mubona mwa lusika lwa ka. Kono ku bonahala inge kuli, Ni ya ni supala cwale, Ni lukela kutuhela kuba fa liwate, ni ikutwa kuboteha ni kuopa, Mwendu hanina ku Mu bona mwa nako yaka. Kono mwendi wena uka mubona, mwana ke.

39 “‘Mi Ni bata ku ku luta Mañolo. Mwanake, pili Mesia asika taha kale, ku kaba mifuta kaufela ya lika ze ka ezahala, mifuta ya lika kaufela, kakuli Satani uka eza cwalo, kuli asinye libubo la Mesia nako Ya taha.’” Kubanga ona cwalo kamita; ku sa li ona cwalo.

40 Mi cwale lufumana kuli, a li, “Na hupula ne ba ni beile lizoho fa maheta, bali, ‘Mwanake, kuna ni fela nzila iliñwi yo kona kuziba Mesia yo ka yona. Cwale lubile ni myaha ye mianda anda kusina mupolofita. Malaki neli yena mupolofita waluna wa mafelelezo. Sekubile myaha ye mianda yemine kwa mulao, ha lu si ka ba ni mupolofita. Kono muhupule, Mushe na lubulelezi, mwa Mañolo, kuli, mi Mesia ha ka taha, U kaba mupolofita, nako ya Na ti lo iponahaza. Luna Majuda lu lutilwe kulumela mupolofita. Mi musipili wa Mesia fa lifasi ki Linzwi le li bulezwi la Mulimu, la Na lu sepisize. Mi Linzwi kamita li tahanga ku mupolofita, mi mupolofita upaka Linzwi leo. Usike wa libala zeo, mwanake! Kwa kona kuba lika zetuna zekataha, kwa kona kuba susumezo yetuna ni—ni lika zetuna. Kono muhupule, Mesia ukaba mupolofita, kakuli lu ziba kuli Mulimu ha cinci linzila za Hae, mi ki Hali Mesia ukaba mupolofita. Kacwalo uhupule, mwanake, bapolofita ki babana ni Linzwi la Mulena. Mi cwale Mesia ha taha, Uka ba mupolofita.’

41 “Na utwa fela lizoho la bona,” kwabulela Simoni, “ha ne ba ni beya lizoho. Mi Andreasi na yemi fani inza tapisa kanyandi, ka nako yani. Wa hupula cwalo, Andreasi?”

“Ee, Simoni, Na—Na hupula.”

42 “Mi Andreasi na lika ku ni bulelela ka za Joani yo kuba mupolofita. Ne nina ni lika zeñwi za kueza, ne ni lekisa litapi ni lika zeñwi. Kacwalo bondate ne se ba shwile kale myaha ya kwamulaho, kono Ni bile ni hupula zeo mwa munahano waka; bondate bali, ‘Mesia yo ukaba mupolofita ya pakilwe ka Mañolo, mi ha ni si ka libala kale, kakuli ki Linzwi la Mulimu le li bulezwi. Mi Linzwi lani li na ni kutaha cwalo katundamo kwa bapolofita; zeo kona ze ne li paka litaba, kamba kubonisa se ne si sepiselizwe mwa lusika loo.’”

43 Mi cwale Simoni, “Zazi leliñwi,” ali, ki hali, “wa ziba, Andreasi na ni kupile kuya kwa mukopano. Mi Na ya teñi kwa mukopano ko ne kuinzi, Mucaha yoo, Jesu. Mi Na utwa mifuta kaufela ya mabulatwi. Ki yani Jesu ya na yemi fani, fapila Hae, ya na sepisize kuba yomuñwi yomutuna, kuzwa kwa mianda yemine mi na shwa, ni zeñwi cwalo. Na hupula kuli neli iliñwi fela ya mifuta yani, ni ancafazo yeñwi ya mufuta o mata, kamba kopano yeñwi yetuna ye neba ka yaha. Kono zazi leliñwi Na hupula kuli Ni ye ni Andreasi fa, muzwanya ka.”

44 Mi Na akaleza, ka yona nako yani, sisepe sa kala ku nyungana. Yomuñwi akala ku huwa, mi ki hali, “Ina fafasi! Usike wa nyanganyisa sisepe. Libelela fa muzuz. Ina u kuzize.”

45 Mi ki hali, “Mwa ziba, ha Ne ni ilo fita kwani mi na taha fapila Hae, nako ya makalelo, A ni talima mwa liito hande ni ku ni bulelela libizo laka. Na si ka ni bona kale fateni. Isiñi bakeñisa kuli Na ni ziba, kono Na zibile yena ndate wa mucemebe yani, ya na ni lutile mwa Mañolo. Mi Na ziba kuli Yani ki yena Mesia. Kuna ani aba mafelelezo, ona fani. Ani neli ona. Zani za kondisa lika, ku na.”

46 Mwendi neli Filipi yana ize, “Nina ni bulele kwateni linzwi foo?” Cwale na ize, “Muzwale Natanaele, se sisike sa ku utwisa bumaswe; kakuli, wa ziba kuli lubalile matapa hala myaha ni myaha, sa ka eza Mesia. Kono ha Ni mubona Aeza cwalo, Na nahuna ni kunga mulikana ka fa, Natanaele. Mi ha na tile. . .”

Natanaele ali, “Ha lubone na ni bulele. Ha lubone na ni bulele.”

47 Oh, mwa ziba, kuna ni nto yeñwi haiba Jesu aku ezeza sika, ha—ha ukoni fela kuyema wali kukuza, una ni ku bulela sesiñwi, wena kasibili. Kana ha ki cwalo? Haiba ki nto ya luli, una ni ku ibulela fela. Mi ha Na ni talize ka Moya o Kenile, Ni bata kubulela zatani. Ni bata kuli yomuñwi azibe. Isiñi mutu usili a li kandeke; Ni bata ku li kandeke, na muñi.

48 Mi Na nahana fela, Natanaele atabela hahulu mi ali, “Mwa ziba, Ni tabela kubulela cwana. Ne ni ni sweli ku ku kakanya, Filipi, ha no ni bulelela. Na ku buza kuli, ‘Kana ku na ni nto yende yekona kuzwa mwa Nazareta?’ Mi wa ni fa kalabo yende hahulu yeo mutu kaufela akona kuba ni yona, ‘Taha u to bona.’”

Zeo za beleka kacenu. Yeo ki niti. Usike wa ina kwa ndu inge u nyazaka fela lika. Taha, u to i ponela ili wena, mwabona. “Nali, ‘Kana ku na ni zende zekona kuzwa mwa Nazareta?’ Ali, ‘Taha u to iponela ili wena.’ Mi wa ziba zo no ni bulelezi.

49 “Mi ha Ni ya Fapila Hae, mi A ni bulelela kuli Ne ni li ‘mu—mu Muheberu, mu Isilaele, ni kuli nenili muuna ya sepahala,’ Ne ni ziba cwalo.

50 “Kono Na komoka, ‘Likona kuba cwani?’ Na bonahala inge mutu wa fela fela. Ne ni kulubela Mesia kutaha fa likoloi za gauda kuzwa mwa Lihalimu, ku yo punya kwa toho ya kopano kwanu, kwa Jerusalem, atahe mi abulele kuli, ‘Keafasi, Ni tile.’ Kono ba fumana kuli, Na zwelela kwa Nazareta, mwa lubasi lwa sibotana; mi mane nana ni libizo le li nsu ka Yena, kuli ‘mwana wa mwa bucwani.’ Kiyi A yema, inza tinile liapalo ze cipile, isiñi inge muprisita kamba mutu yomuñwi; neli fela mutu wa fela fela. Mi Na hupula kuli, ha Ni ya kwani, ‘Ukona kuba cwani Mesia kana? Na apezi sapalo sa kale, Na si tinile kuzwa kwa bucha bwa Hae, mi ona sapalo sesiswana sani u sa si tinile ni kacenu; mi milili ya Hae ne i wa mwa mukokoto wa Hae. Mi sina mutu wa fela fela mwa mukwakwa.’

51 “Mi Na ni talima mwa pata, ki hali, ‘Mane Filipi a si ka kubiza kale, no inzi mwatas’a kota, Ni ku boni.’ Ani neli ona mafelelezo ku na. Na ziba, ka Linzwi, kuli neli yena Mesia. Yani neli Yena.”

52 Mi sisepe hakulata sa to nyungana hanyinyani, mi mukopano wa bupaki no zwelapili fela. Oh, ha ki nako kwa bunde ye ne banani, fa liwate lani, ka kuba fela ni nako yende.

53 Andreasi ali, “Ni tabela kubulela taba ye ne ni kakamalisize hanyinyani. Mwa hupula hane lu—lu ya kwa Jeriko? Ki hali, ‘Lu swanela kukambama; Ni tokwa kuya kwa Samaria.’ Kacwalo, Aya kwa Samaria mi ona kwa munzi wa Sikare kwani, ha Na lu lumile ku yo leka lico mwa munzi.”

54 “Oh, ee, Na hupula cwalo, hande!” Kaufela zona, “Ee, ee!” Sisepe ne si sweli fela kunyungana, mañi ni mañi inge aikutwa fela hande kasumulaho wa ancafazo kufela. Kacwalo nebana ni mukopano wa bupaki woo.

55 Mi ki hali, “Ee, mi mwa hupula ha lu to kuta, mi, a lu komokisa, lwa bona Muluti wa luna inza ambola ni lihule le li zibahala. ‘Uh-huh,’ lwa nahana kuli, ‘kinto yemaswe. Lwa Mu katanyeza inza ambola ni musali yani. Mi a lu luma, mi ki Yo fa uinzi ni musali wa libubo leli maswe yoo banzi fa.’ Mwachupula, lwa yema kwa mulaho wa macacani kwani, mi lwa teezeza kwa lingambolo zabona.

56 “Mi lwa Mu utwa a ambola ni yena, ‘Musali, zamaya u yo biza muuna hao mi mutahe kwanu.’

57 “Mi se luli, ‘Kihande, mwendi ha lu zibi hande, mwendi musali yo na nyezwi.’

58 “Mi musali a Mu talima mwa pata, ni kubulela kuli, ‘Muñaka, Ha ni na muuna.’

59 “Mwa hupula lipilu za luna mo ne liswabezi? ‘Mesia wa luna yomutuna yeluna ni sepo kuyena, fa u swasehile mwa buhata, ki litumbutumbu la mulilo, kakuli Na ize, “zamaya u bize muuna hao,” mi musali amu pakela kuli na sina muuna. Cwale za Mu swabisa esi.’ Mwahupula mo ne lu bonahalezi kukomoka kaufela, mane moya wa lu fela?”

“Ee, Na hupula.”

60 “Mi cwale mwa hupula manzwi atatama? Ki hali, ‘U bulezi niti, kakuli ubile ni ba ketalizoho, mi yena yo pila ni yena cwale ha ki wa hao.’ Oh, mwa hupula mukopano wa bupaki kwa mulaho wa sicacani? Mawi!” Mwabona, ha ukoni ku Mu swasa. Ki Mulimu. “Oh,” Simoni ali, “zani fela. . .” Andreasi ali, “Zani fela za ni likana.”

61 Bartolomeu ali, “Amulibelele, Ni tabela kubeya fateni bupaki nina. Ni bulele nji, mizwale?”

62 “Oh, kihande, Na sepa wakona kubulela, luna ni nako yeñata. Ha si ka fita kale, kacwalo lu ka fuluha nyana fela. Zwelapili muuna, Bartolomeu, aku pake.”

63 “Kihande, ilinwi ya litaba zetuna ku na, mwa hupula kezela luna kwani kwa Jeriko, yabizwa Rebekah?”

“Eeni.”

“Ni muuna hae ya na nani resitiranti kwani.”

“Uh-huh.”

64 “Mi—mi na li muuna wa pisinisi, mi libizo la hae neli Zakia.”

“Ee, ee, Na mu hupula handende.”

65 “Mwa hupula, nali—nali alimuñwin wa likezeli zaluna. Mi na lumela ku Mulena, mi na sabile hahulu kuli Zakia uka itulela fela Jesu mane afitelele. Mi, oh, Zakia nali mulikani yomunde wa muprisita kwani. Mi kacwalo musali nasweli kulapela kuli sesiñwi si ezahale kuli meto a hae akwaluhe, mi na ka lemaha kuli yo neli yena Muluti, le neli lona Linzwi la Mulimu ne li pakilwe, le li ezizwe nama mwahala luna. Mi lwa lika ku mubulelela. . . kumubulelela ka mo Jesu wa Nazareta na zibela likunutu za lipilu, kubonisa kuli Na li yena Linzwi, kakuli Linzwi lilemuha milelo ya mwa pilu.

66 “‘Bukuba,’ ki hali, ‘Na lumela muprisita. Sa bulela muprisita si likani kuna.’ Kakuli neli wa ba—wa ba milao ya muleneñi wani, ba Kiwanisi ni babañwi kaufela, mwa ziba, kacwalo yena. . . nelili tata kuli ali tuhele. Kacwalo Rabekah na lu kupile kaufela kuli lulapele—lu lapele. Mi nako kaufela hane lutaha fa taba ya kuli Nali mupolofita, na bulela kuli, ‘Bukuba! Muprisita

ali, “Ki Baalezebubi. Ki diabulosi. U eza zeo ka mata diabulosi. Mi Yena ki munuhi fela wa minahano. Kona fela ze liteni. Hakuna zeñwi hape.” Kona kuli hakuna nto yecwalo mwa lizazi le; ha lu sikaba kale ni bapolofita ka myaha ye mianda yemine. Mi cwale Mucaha yani ukona cwani, mane aana neba kadi ya kopano, Ukona cwani kuba mupolofita? Oh, hakuna mwa Na kabelo nto yecwalo!’

⁶⁷ “Kono, mwa ziba, Rebekah atundamena cwalo, musala hae, ni kulapela. Mi kakusasana omuñwi Jesu ha na taha mwa munzi, kihande, cwale lufumana kuli, Rebekah na lu bulelezi kuli Zakia naile kwa—kwa mukwakwa, ku yo Mu bona. Kacwalo na sa lumeli kuli Na li mupolofita, kacwalo a li, ‘Ni ka Mu talimela fela hande,’ mwa na lu kandekezi zona kwa resitiranti ha ne lusweli kuca. Kacwalo apahama kwa kota ya sikomora, mi ali, ‘Mwa ziba kana, Ni ka itimeza fela mitala kwahalimu kwanu kuli Asike a ni bona. Ni mutu yomukuswani, esi, mbonezi kai. Mi ha Ni koni ku Mubona fafasi fani, mwa nyangela ni ndopu, kacwalo Ni ka pahama fela kwahalimu a kota kwanu.’ Mi ayo fita mwahala mitai yemibeli—yemibeli mwa lifata, mi teñi aina, mwa lifata.”

⁶⁸ Sani fela ki sibaka sesinde sa kuina kusona ni kubala. Foo kona fo ku kopanela linzila zepeli, ya hao ni ya Mulimu; milelo ya hao. Yeo kinto yende, ku nahanisisanga lika.

⁶⁹ “Kacwalo ki hali, ‘Mwa ziba kana, Na lukela kuba mupolofita. Na kaba cwalo. Ne kukaba bunolo kuli mwendi Na fosa. Kacwalo Na mi bulelela, Ni ka Mu talimela handende; mi Hana ku ni ziba. Kacwalo Ni kanga fela matali kaufela ni ku hoha sina cwana, ni ikapese ona, mi Ni ka itimeza milata kuli Ani si ke a nibona neba hanyinyani. Mi Ni ka Mu bona ha nza fita. Mi haiba Abonahali inge mutu ya swanela cwalo, Ni ka Mu fa munahano waka, inge niinzi ona kwa kota ye.’ Kacwalo atalima, mi kwabuse bwa sitali anangela mi a Mubona a Na taha bukaufi ni manganandila.

⁷⁰ “Mi Ha yo taha bukaufi ni manganandila, ataha cwalo mwa nzila, mwa ziba, atalima neku le ni leliñwi, mi balutiwa ba li, ‘Amuyemele kwatuko. Ni swabile.’ Mi sicaba ni batu ba bakula ni lika zeñwi. ‘Ni swabile, Muluti u katezi luli; sebelezo tuna ya maabani busihu.’ Mi, ka likute cwalo, ‘Amuyeme kwatuko Afite kwateni, hanze Ataha cwalo ka nzila ya Hae mwa munzi woo, shangwe amu yeme fela kwa matuko?’ Mi Zakia ali kuina mwa lifata la kota cwalo, inza Mu talima.

⁷¹ “Mi Jesu ataha kapili mwatas’a kota, ayema, atalima kwahalimu mi ali, ‘Zakia, tuluka kuzwa koo. Ni ya kwa ndu ya hao kacenu, ni yo ca mulalelo.’ Ani neli mafelelezo ku na. Na zibile kuli naliteni kwa kota kwani, mi na zibile libizo la hae, yoo nali yena. Ani neli mafelelezo. Yani ki Mesia, ku na. Eeni, sha. Kakuli, lu ziba kuli Mesia na lukela kueza ona cwalo. Kiniti.

Kacwalo Nana ni kuya ni yena, ali, zazi lani kwa mulalelo. Ha ki nako yende ni yeo! Lwa i hupula.”

⁷² Mwa ziba, mwendi neli ka nako ona yani, mukopano wa bupaki nosweli kuezahala. Mwa ziba, balutiwa baa fa liwate fani, ne ba paka cwalo, ne se kuba kafifi mwa busihu cwalo, kwani kwa libaka za kwa mutulo, kuli Satani ataha fa lilundu mi atalima fafasi. Atalima mwa mukopano wa bupaki wani, mi afumana kuli ne ba ile kusina Yena. Fani afumana kolo ya hae.

⁷³ Mwabona, Ni sepa kuli pono yani ilukela kukalisa hape, ilukela kukutela. Neba bile ni, ancafazo yemata, ne ba bile kwahule ni Yena. Mi Na lumela kuli ki zeñata ze ezahalile kacenu, kuli, mwa hola ye ya kulyangana, ni kasumulaho wa ancafazo ye lu iponezi. Li potolohile lifasi kaufela. Naha kaufela ibile ni mililo ya ancafazo ye tomilwe, mi yetuka; lisebelezo zetuna za lifoliso; batu ba amuhela Moya o Kenile, ka likiti za likikiti ni kualala ka likitikiti. Mi mwa mata a zona, sina balutiwa bani mo ne ba pakela sa Na ezize, “mi, oh, lu Mu boni ha eza sa *kuli*, lu Mu boni ha eza *sani*,” Ni lumela kuli se lu keluhile sina bona, kusina Yena.

⁷⁴ Lu ile kwahule kwa linako zetuna zeo—ze ancafazo itisize. Lu ile kwa litaba za kupanga masheleñi amañata, likeleke, kuyaha mihayo yemituna, libaka zetuna za ma dollar a likana ma milioni, likolo zetuna, milao ya za tuto, ni kueza kopano yaluna kuhula. Mi ni kuba ni litukiso za luna za swalisano, kulwanisa swalisano, kona fela zelukona kuambola kacenu. Mi taba yapili mwa ziba, Satani u luboni mwa litukiso zaluna za kulwanisa swalisano, fa litukiso zaluna zetuna za likopano, mi ni za luna za “ma milioni amañata,” ni zeñwi cwalo, sina mo ze banani.

⁷⁵ Mi lu keluhezi kwahule kusina mukopanoi wa milapelo ya mufuta wa kale ni kolobezo ya Moya o Kenile kukuta, kufita mane mulilo ha so timile. Wakona kuhuwa, ni kulika ku bizeza sicaba kwapili kwa aletare, mi ba zamaye inge baba bata kushwa, kushwela kutaha. Mi ni kukupa bakutazi ku to lapela ni bona, “Oh, kiñi za ni kupezi?” Mi ba kubama fani, mi mane haukoni ku ba swala. Mi ba yema fani ka mizuzu yelikani, ba kotalima, mi bakuta ba yo ina mwa lipula zabona. Ku na, mulilo so timile! Sesiñwi si ezahalile. Muteezele! Se lutokwa ki ancafazo, baezalibi bani, kotalima ku Kreste, kubaka, kumatela kwa katala ni mazoho abona mwahalimu, kuhuwela sishemo, ni keleke kaufela ituka mulilo, ka kanya ya Mulimu.

⁷⁶ Nyakalalo yaluna kwa kolo ya kubata kuli likopano lihule, lu yahile likolo zetuna za kuluta bakutazi baluna, ni kuba lumela kwahule ni Mulimu kufita mo ne ba bezi kwa simulaho. Mulimu ha zibiwi ka tuto. Ha zibiwi ka lituto za litumelo. Mulimu u zibiwa ka tumelo. Ha u koni kutatulula Mulimu. Ha koni ku tatululwa.

77 Mutalime ze ezahalile, luna batu ba Pentekota bene ba banga ba pentekota. Bahame ba luna ba kukuzi milili yabona, ba ipenta lifateho. Ba ha ndate baluna ba li lumeleza. Bakutazi baluna ba li lumeleza. Ba saba kubulela sika ka zona. Keleke i ka ba leleka ba sa lika fela kubulela. Oh, haiba ha lutokwi kufiyela mwa ndu, kuzwa kwa katala ku yo punya mwa malibela. Ki maswabisa. Mi maswabisa luli.

78 Muuna yomuñwi na tile kuna, ha ki kale hahulu, mi ali, “Muzwale Branham, sicaba sa ku lata.” Kono ali, “Ulata hahulu ku ba omanyanga, u omanyanga hahulu basali bani, ka za kukuta milili bukuswani ni lika zecwalo.”

Na li, “Bibele ibulezi kuli ki maswabisa kuli musali akute milili.”

79 U shubula muuna hae ha eza cwalo. Mi seo luli ki sisupo sa niti kuli u zwile ku Mulimu. Muhupule, mwa taba ya Samsom, milili yemitelele neli sisupo sa bu Nazareni kuli na zwile kwa lifasi, kutaha kwa Linzwi la Mulimu. Mi ha mu kuta milili ya mina, basali, mu latula sisupo sa bu Nazareni. Mu ile kwa Hollywood kufita kukuta kwa Bibele. Bibele iize, “Bao basike ba ikukula.” Mwabona, ki maswabisa, mi mane bakutazi hakuna ze ba bulela ka zona.

80 Muuna yoo ali ku na, “Kiñi ha u sa batuheli basali bani?” Ali, “Ba kotalima kuba mupolofita.”

Se nili, “Na li kuba Ni bulele kuli ni mupolofita.”

81 Ali, “Ba kotalima kuba cwalo. Ba lute mwa ku amuhelela limpo za moya ni ku eza lika zeñwi. U lukela ku baluta lika zetuna, litaba zetuna.”

82 Na li, “Ni kona ku ba luta cwani alugebura kanti ha ba zibi ABC yabona, mwa kupilela hande ni zona? Uka eza cwani zeo? Eehe, shetumuka kwa sika sa makalelo.”

83 Mwaha kasamulaho wa mwaha, nasila linaha, kono liya libanga bumaswe ka nako ni nako. Kuna ni sesiñwi se si fosahala kokuñwi, ha si zamaeleli ni Linzwi. Ki kabakaleo halusa koni kuba ni ancafazo yetuna mulilo. Lu tokwa nako ya ku tanyela mwandu. Mulimu haana kueza zeo kufitela lukuta hape. Lu tokwa nako ya kutanyela mwandu.

84 Mi wena muuna tuwe, u ka lumeleza musala hao kueza nto yecwalo, atine tupula! Bao ha ki ba Methodist, Baptist. Bao ki ba Pentekota, yeo ki niti, “mufuta wa bulapeli, Lusika lwa Keleke ya Laodesia, kuenya,” Pentekota ka libizo, ku felile. Pentekota ha ki libizo, ki kutwisiso ya kolobezo ya Moya o Kenile, ye kenisa sicaba. Kona ha lu sa koni kuba ni lisebelezo za foliso ni lika zeñwi, kuna ni se si ezahala ka mafosisa kokuñwi. Ki Satani, na luboni ha lu lika kueza . . .

85 “Kihande, lu sa bulela sika ka zona, ba ka cinca puteho.”

⁸⁶ Muhupule, ha mu lukeli kukombelela Bakreste. Bakreste ba buhali. Ki baana ni basali ba Mulimu, baba yemela Mulimu, hakuna taba kamba mutu ubulela sikamañi. Ha u lukeli ku ba kombelela, ni ku ba sela sende ni kuba cikisa inge mbututu. Yeo ki simu ya licalo, licalo za mazwake, ha ki zende neba hanyinyani, halikoni ku itahisa ili zona.

⁸⁷ Si ni hupulisa, inge mwa . . . I kaba nako ya kupanga liyaletu cwanofu. Ne ni bona linyunywani zenyinyani kacenu, kulo kwani, tumbalamatende totuñwi inge tunopa bucwani kuisa kwa siyaletu. Hakuna kunga nako tuka kala kuyaleta, ku bubamela mai atona kuli andondoke. Mwa ziba, nyunywani yakona kuba ni siyaletu sa mai, mi yakona kububama fa mai ao, ni ku a fetulanga fa mizuzu yelikani fa ni fa; ya zwiwa fateni mahutu ni ku afetaula, ni kububama fateni. Cwale, haiba ituhelela mai ani kubatelwa, haiba akile a futumalelwa, haana kundondoka. Mi kipeto ya fufa fela fateni ku yo sela tucu nyana, ni kufufela fateni hape.

⁸⁸ Mi mwa ziba, yona nyunywani ya mushemi yani, yakona kububamela mai ani, ni ku afetaulanga kasamulaho wa mizuzu yemibeli, kono itokwe. . . neba ku ikataza mane ni kuitima lico kuli mane ipalelwa kuzwa fa siyaletu. Kono haiba, fela, nyunywani ya mushemi yani ya li kuba ikopane ni ya mukombwe, mai ani haana kundondoka. Hakuna taba kamba kucwani, mo kona ku a kombelela, haana kundondoka. Aka inelela ona mwa siyaletu mwani ni kubola.

⁸⁹ Mi haiba kukile kwaba ni nako yeo Mapentekota ba swanela kuba ni Mulikani, Jesu Krete; kakuli hakuna ze lunani kwand'a siyaletu se si tezi fela mai abolile, balatula Tumelo, bakena mwa Katengo ka Swalisano, ni ku kabiza kuli lika zetuna, kuina bukafu ni popu, ni kubulela kuli "kiza moya." Ki butata mañi bobuli ni lifasi, mina sicaba sa Pentekota? Kikuli ha mu zibi Bibeke ibulezi ka litaba zeo ku ezahala? Mi lwa huwaka kakuli ba Methodist ni ba Baptist bataha mwateni, mi ni lika zeñwi ze kaufela cwalo. Kana ha muzibi kuli mwalanjo ya lobezi ha na i lo leka Oli, kuli neli yona nako yeswana Munyaliwa ya tile ka yona? Mane ne ba si ka ifumana Oli! Mwa ziba, Kuungelwa ku ka ezahala sina kunutu luli, ni kushimbiwa, yeñwi ya linako zee, mane hamuna kuziba kuli liezahalile. Ku ka ezahala, mi mu ka komoka ze ezahalile.

⁹⁰ Sina Joani mwa natezi mwa lifasi. Mi ba li ku Yena, bali, "Kihande, Bibeke iize, Elia uswanezi kutaha pili." Mi ali, "U tile kale, mi ha mu si ka mu ziba."

⁹¹ Kona mo ku ka bela, zazi leliñwi, ba kali, "Hanili ze ne li lukela kuezahala pili kusikaba kale nako ya Nyandiso. Ne ni hupula kuli Kuungelwa ne ku lukela kubateni pili." Manzwi ao aka yo kuta hape, "Li ezahalile kale mi ha mu si ka li ziba." Uh-huh. Nako ifelile kale kufita mo mu nahanela. Oh, muzuhe, keleke! Kihande ni tuhele zeo; Ha ni si ka tela tuto kwanu,

Ni hupuzi fela kuli Ni nokele mwateni seo kuli mube ni sona fa noka.

⁹² Muhupule, muzwale, Satani u boni litukiso zetuna zee, keleke ye ilika kufita yeñwi, kopano ye ilika kufita yeñwi, kuzwisa mwateni ku sa ituta kaufela mi bana ni ku bafa tatubo ya ngana ya mwa toho, babe ni mutatubi wa ngana ya mwa toho abone haiba mutu uiketile asika ya kale mwa masimu. Pentekota! Batili, bao—bao—bao ha ki ba Presbyterian, ki ba Pentekota. Tatubo ya mo ibelekela toho ilukela kufiwa kwa sikwata sesiñwi sa ba Pentekota, sikwata sesituna, bahasanyi ba linzwi ba sika isiwa kale mwa simu.

⁹³ Kucwani kambe nebana ni tatubo yecwalo? Bana ni tatubo. Neli tatubo ya ba pentekota kwa makalelo, hane ba libelezi mwa ndu yafahalimu kwataha Mulilo ozwelela kwa Lihalimu, ni Mata a Mulimu. Yani neli yona tatubo.

⁹⁴ Isiñi zeñwi za bulifasi, mutatubi wa ngana yamwa toho ni mambengo a hae alike kusikulula booko, haiba u ya tabezi nyana, kamba nto yeñwi cwalo, bali, “Wena ubonahala fela kusitana kihona.” Kanti, sibonisa fela kuli mutu buino bwa hae bwa moya bu lyangani, una ni kuba cwalo kuli a Li amuhele. Kacwalo ki fo he cwale, mwabona, ni kulyanganisa fela zeo Mulimu abile alika kueza hala lilimo, ni kutaha hape ni litukiso zabona ni lika zetuna zabona . . .

⁹⁵ Ba tabela ka kukatulula ha ba bona nyangela yetuna haiputehani hamoho. Bali, “Kambe Ne ni kaba fetula ku ba eza ba Assemblies kamukana mina! Kambe Ne nika ba eza ba Oneness! Kambe Ne nika ba eza ba Methodist!” Ba Methodist basweli kulika ku ba fetula kuba ba Methodist kaufela, ba Baptist basweli kulika ku ba eza ba Baptist, ba Pentekota kaufela ba be ba Mapentekota! Oh, hakuna zemukona kueza ka zona, Mulimu u li beile ona cwalo kuzwa kwa makalelo a lifasi. Luna ni kukutaza Evangeli. Ki hona. Kono, litukiso zaluna zetuna, luile lukeluhile kusina Mulilo sakata. Lu ile ka kuikezeza mulilo waluna, mo ne lu ka bulelela.

⁹⁶ Mi swalisano ya luna, cwale lu sabile hahulu, swalisano i lu kenezi, “Kiñi ze ka ezahala?” Kono, mwa ziba, nto yetuna ha ki ba swalisano. Ha luboneñi ni mi bulelele seo cwale, Na saba ba swalisano.

⁹⁷ Kono ze Ni saba, mina Mapentekota, Katengo ka ba Swalisano ka kaka mi nga. Yeo kona taba yatani. Kaka bupa nombolo ya sibatana, mi mukaba ni kukena ku zona. Kakuli mu katengo fela, muna ni kukena kamba kuzwa fande. Zeo kona lika zatani, mi mutu ufi kaufela, wa ngana, yanahana, wa moya hande uziba ona cwalo. Lutokwa bupaki bobuñwi bwa fa liwate, kona mo lu li fumanezi cwale. Mi Pentekota yaluna, isweli fela kulimizeleza, kuswaseha, bapumilwe kufelelela, “Ha ki nto kwabutuna mo i ka bela!” Mi, Methodist, Presbyterian,

Lutheran, church of Christ, ni Mapentekota, muna ni kulatula—kulatula tuto ya mina yetuna ya buapositola, kuli mube mwani. Bana ni kueza zeswana. Hamuna kuba ni za kueza fa kukena mwateni. Kaufela li lumelelana ni Rome, ona cwalo fela ze bonisizwe. Mañolo abulezi ona cwalo.

⁹⁸ Ki butata mañi bobuli ni bakutazi baba tuhelela lika zeo kuba mo libezi, kusina kulemusa sicaba? Mulimu uka li bata mwa mazoho a bona. Ona fa nako ya butata ye, nebali mwa butata, nebali cwalo. Swalisano ne i si ka kena mwateni; ki Katengo kaba Swalisano kaka ka mizelela sikwata kaufela. Mi muhupule, ha mu bulela kuli, “Hakuna . . .” Za ezahala, kipeto nako ikabe ifelile. Se mu amuhezi kale nombolo ya sibatana. Mu kwa siemba sa yona fo cwale.

⁹⁹ Kihande mube komukona kuba kwahule ni yona cwale, eni, sha, mu swaiwe mwa Mubuso wa Mulimu. Mubili wa Krete kona Mubili wa kunutu wa Krete, koo ki ku kolobezwa ku Ona ka Moya o Kenile; isiñi ku i kopanya ku Ona, kungelwa ku Ona, kubulela fela za Ona, kubulela ka malimi ku Ona, kuhuwakela ku Ona. U na ni kupepwa ku Ona, ka Moya o Kenile. Yeo ki niti. Kiniti.

¹⁰⁰ Cwale lu lemuha lika ze, butata bwa taha ona fo ka sipundumukela. Oh, diabulosi na talimile mi ali, “Uh-huh, bakeluhezi kwa kacimacima ni kulila, bateni kwani inge batulaka-tulaka fela, kuhuwa, bana ni nako yende. Mwa ziba kana, ye seli nako yaka ya ku ba nwelisa. Ni ka banga ni ba cimbeke cwale.”

¹⁰¹ Kacwalo ataha fa lilundu mi akala kuba fukiseza moya wa sifanu, whew: “Mazazi a limakazo a felile. Esi mane, Ni lumela kuli batu baa basweli fela kuikalelwa. Ni sepa balukela kuba ni—ni—ni tatubo ya mwa toho ba si ka ya kale mwa masimu.” Mapentekota! Uh-huh. Amubone moya wa hae wa sifanu mo u bulaezi Linzwi, “Oh, Ni sepa ki Nto yeñwi fela, Na—Na lumela kisona . . .” Mwabona, bakutela hape mwateni inge babañwi kaufela ba likopano mo ba ezelize, yeo fela kona nzila ye ba zamaya ka yona. Baka ba, ya libulaya. Yona hola luli ye mu li kubukanya, kona ye libulaya. Kamita ibile ona cwalo. Kamita ikana ili bulaya. Haina kuzuha fateni hape. Ha li sika zibiwa kuba cwalo mwa litaba za kale. Mwa—mwa Lusika lwa Keleke ya Laodesia, Krete na li kwande a keleke, inza ngongota, kulika kukena mwahali. Mi ha bakoni fela ku Liyemela. Habakoni ku Li utwa. Cwale lufumana kuli, nako yelupila kuyona, butata bukeni kuyona.

¹⁰² Mi cwale lukala kufumana pili, kuli limakazo ha li sa ezahala ni hanyinyani, sina mo ne li belanga. Bakuli ba kutela kwa mandu abona inge ba kula. Ha ki bakeñis’a Mulimu. Ki kabakala kutokwa ancafazo mwahala sicaba. Hakuna ancafazo. Ba—ba baina ni kuteeleza; baya kwa mandu, bali, “Kihande, Ni sepa

zani neli zende luli. Uh-huh.” Mwabona, hakuna ciseho yani. Hakuna sika sesiñwi sani mwa sicaba sesi lukela kuba teni.

¹⁰³ Na hupula myaha ye fifitini kwa mulaho, kwanu kwa Arkansas, hane Ni na ni mukopano nyana kwani kwa Jonesboro, hane kuna ni batu babakuma fa fote-sauzande bene balika kufumaneha ku ona, bataha kwa mukopano mwa muleneñi okona kukwana ba fifitini sauzande. Mi ba lobala mwatas’a bimbayambaya bya bwanda ni lika zeñwi kaufela, basweli mapempa a bana babona babakula, kuli bakene mwahali. Baina mwa lipula zabona mi ne ba sa lati kunanuha, musihali ni busihu, mi balatiwa ba bona ne ba yo ba lekela liñende mi ni—ni botela ya sino; mi baina ona fani, musihali ni busihu, musihali ni busihu. Lipilu zabona ne li cisa, kutuka mulilo. Nto yenyinyani fela ya na ezize Mulimu, ya ba beya fa mulilo. Mi mianda anda yabona ba taha.

¹⁰⁴ Yena usali Mulimu ya swana, busihu boo, mwa Na inezi myaha ye fifitini kwa mulaho. U sali Mulimu yaswana, busihu boo, mwa Na bezi nako Ya bupa lihalimu ni lifasi.

¹⁰⁵ Kono ki sikamañi seo? Kaufela lwa ba ni tabo yetuna mi lwa tabela kuyaha likopano, lu batile kuyaha *se*, ni kuyaha *se*, ni kueza nto yeñwi yetuna mi ye benya, haibapiswa ku ba Jones, ni ba Methodist, ni ba Baptist, ni ba Presbyterian. Ha u siemba sa bona. Batili, ha u kubona. Ki batu balikopano, ili lika zende mane, hakuna ze ni nyaza ka zoma. Kuna ni Bakreste babañata mwahala bona, kono ha mulukeli kufumaneha ni sikwata se si sa lumeli seo. “Batu baba latula Mata a lika ze,” hamu lukeli kufumaneha kwa neku la bona.

¹⁰⁶ Mwa ziba, butata bwateni ki kuli, mulika ku kenya Hollywood mwa keleke. Taba ye mulukela kulika kuezanga ki kulika kuzwisa Hollywood mwa keleke. Mwabona? Mulika kueza muyaho wa mina kuba omunde luli, mulika kueza kopano ya mina kuba yetuna luli, kufitela mane imema kutwisiso ya sicaba. Halukoni ku ya kwa neku la bona. Lu lukela kuba ni bona kwa neku la luna. Lika kaufela ki ze benya, muhupule, Hollywood imonyeha ka bulifasi, kono Evangeli ibenya mwa buishuwi. Kuna ni shutano mwahala kumonyeha ni kubenya. Evangeli i benya mwa buishuwi, ni musa, ni kuikuteka, ni mata. Kanti, Hollywood yona ya monyeha, mi mañi ni mañi wa takisa ni kuhuwaka, ni kuzwelapili kuzona. Mwabona? Ha lutokwi zeo.

¹⁰⁷ Lu bata kupila mwa Liseli le li cwalo. Na ize, “Mu lizwai la lifasi.” “Haiba lizwai le felelwa ki kubaba kwa lona,” ao kona mata lona mwa Evangeli. Lu lukela kuba ni sesiñwi se si zamaya mwa likeleke zaluna, ma Methodist bani, Baptist, Presbyterian, ni babañwi kaufela, ba ba tabela kutaha. Lu lukela kuba hahulu ni lizwai! Lizwai kona le li tisa linyolwa, libupa linyolwa. Lizwai kona silungiso, haiba li swalisana. Lina ni kufumanwa.

108 Mi lu fumana kuli, mabifi aluna alika kubapiswa ku ba Methodist ni Baptist, ni miyaho yemituna ni libaka zetuna, ni batu babande baba itutile, ni likolo zetuna ni likoleji zetuna, ni lika kaufela ze cwalo. Lu keluhezi kusili ka mabifi, mi ki fa cwale butata se bu lu kenezi.

109 Mi ngana ya moya italima ni kubulela kuli, “Kifo, libelela fa muzuzu fa, kikuli kaufela luna ni kuya ni Katengo kaba Swalisano nji? Kikuli sikwata sa luna kaufela si ka kena kukona?” Luli, musweli mwa ya. Yeo kona niti. Mutalime mi mubone haiba ha mu keni kuzona. Bibeke ibulezi kuli mukaba cwalo, kiniti, mi Kreste ukaba fande. Kweli ne i ti lo ba lififi fapila popu (wapili yana ile kwa Rome), busihu bobuñwi, ku mibonisa sisupo mwa lihalimu. Ze si ka nuhiwa, ne li bile ona cwalo. Ka mo Mulena aezeza lika mwa lizazi lee, kwa tabisa!

110 Mi cwale mwa hola tuna ye ya lififi, hane bali kwani, moya wa taha. Sepo ya kupila kaufela ya fela. Cwale ki sikamañi se mu kaeza haiba kopano ya mina ikena mwa Katengo ka Swalisano? Kiñi ze ka ezahala kwa lika zaluna zetuna ze lu ikahezi mwa lifasi, sepo ya mafelelezo iicongile?

111 Kono mwa ziba, hane bali bukaufi ni kuhuwa, mi sepo kaufela ifelile, ne basike ba piliswa; mi hañi hañi fela, ba Mu bona inza taha, azamaya fa mezi. Mwa hola ya lififi, A taha, inza zamaya.

112 Kana mwa ziba? Ha Na ba siile, Na ziba kuli li ka ezahala ona cwalo, kawalo a Pahama lilundu lelitelele hahulu ku anali teni mwa naha. Hauya hahulu mwa halimu, kona ukona kubonela fahule. Mi Apahama kuli Aba bone, mwa ziba.

113 Mi Na ziba kuli ze ne li taha. Na bulezi kale kuli lizazi le likaba faa. “Sina mo ne kuinezi mwa mazazi a Sodoma, kona mo ku kabelani ni fa kutaha kwa Mwana mutu, foo Mwana mutu ha ka patululwa.” Mi, Mwana u na ni kupatuluwa. Lusika lo lwa bumaswe ni bubuki lubata sisupo. Lu kaba ni sisupo. Si ka ba hana sina mo ne kubezi linako zani, kono ikaba sisupo sa zuho. Yena u sa pila, ueza sina mwa Na ezeza.

114 Lu fumana ona cwalo, kuli mwa hola yetuna yee, balutiwa bani kaufela mwa ñalelwa, Apahama fahalimu kuli Aba buhe. Na inzi fahalimu a lilundu fani, inza ba buha.

115 Mi cwale Na si ka pahama lilundu ka nako ye, kono Apahama kuzwa mwa libita, kupahama kukena mwa mbyumbyulu, kufitelela kweli, linaleli, kuli mane Aya kwahule kuli Una ni kutalima fafasi kuli abone Lihalimu. Mi fani kona Fa inzi, kwa Lihalimu. Cwale liito la Hae li bona nyunywani kaufela, mi Ni ziba kuli Wa lu bona. Usweli wa bona.

116 Mi ona mwa hola ya lififi ye, foo likeleke ha se li keni fela mwa litukiso zetuna tuna, mi lina ni tukiso ye ni tukiso yani, kaufela li lukiswa sina likeleke zateni kaufela molibezi, likopano. Mi kiñi ze ezahalile? Mwa hola ya lififi, foo sicaba

se si tezi moya luli sa komoka, “Kiñi ze ka ezahala? Mutalime banake!” Muuna uli, “Talima musala ka! Talima sa *kuli!*”

117 Mi ba zwa la Sunda, kamba la Bulalu busihu mwa mukopano wa litapelo, kapili, kuli ba yo buha *We Love Sucky*, kamba nto yecwalo, fa televishini. “Ba balata lifasi, hahulu kufita kulata Mulimu.” Baeza inge bona.

118 Ne ni bulelezi kalibe zazi leliñwi, na tinile ndelesi yekama luli. Na li, “Kezeli, ndelesi yeo ikamile luli. Ha ku kona kuitwahala hande kuli ni ku bulelele cwalo, kono awa ikamile luli. U Mukreste, mi uba sitataliso.”

119 Ki hali, “Kihande, Muzwale Branham, wa ziba kana?” Ki hali, “Wo kona mufuta fela oba lukanga.”

120 Se nili, “Ba sa lekisanga masila, mi ba na ni mishini ye luka libyana. Hakuna buinyazo.” Ehe.

121 Muteleeze, alubone ni ku bulelele nto yeñwi, mulikani yomunde. Ha ni ku omanyi. Batili, sha. Ni lika ku mi beya kwahule ni butata. Haibile fela si moya seo siteni ku wena, u ka eza ona zeo. Yeo ki niti. Una ni kupepwa kuzwa ku zeo. Cwale wakona ku fumana mayemo a hao kuzeo, kono halubone ni ku bulelele nto yeñwi, mwabona, “Seo pilu ya hao ili sona, kona litakazo za hao mo likabela hape.”

122 Ha lubone ni mi bulelele. Wakona kuba fela ya kenile sina mulilima ku muuna hao, mi hakulata wakona kuba fela ya kenile sina mulilima, musizana yomunde, ku mulikana hao wa mushimani, kono zazi leliñwi Mulimu u ka yo kuyemisa kuli uikalabele ka kuezwa boozwa. U na ni mulatu ha utina cwalo. Jesu naize, “Kaufela ya talima musali ni ku mu lakaza, u sa mu bukile kale mwa pilu ya hae.” Mi muuna yani ha ka yo ikalabela, muezalibi yani, ka ku kotalimela, ka kuezwa boozwa, kimañi ya mu kashelise kuzona? Munahane fateni. Mina basali ba Pentekota, maswabisa ku mina! Mwabona? Maswabisa ku mina!

123 Na mi lata, kona ze Ni bulelele cwalo. Lilato la sikulula.

124 Lu mwa mabifi amatuna, mabifi amatuna ka mitinelo. Kuswana fela, ni mafasho a lifasi. Na ize, “Musike mwa lata lifasi, kamba lika ze ma lifasi; haiba mu li lata, lilato la Mulimu mane haliyo ku mina,” Hanina taba ka mo bulelela mwa malimi, kutula tulaka, kubina, kukuta milili, kutina mandelesi a cwalo. Wena muuna wa li lumeleza. Miselo ya hao luli kona ye bonisa fo unzi. Yeo luli ki niti. Ki kabakala ha luli mwa butata bo luli kubona, ni mioya ya swalisano, mioya ya likeleke, mioya kopano ya swalisano!

125 Ki—ki nako ya ku ikopanya, nako ya kuputehana. Ba tutengo basweli ba ongaonga babeleki, inge ba omana ka zona. Linaha lina ni—ni ba United Nations, basweli bakopana. Likeleke za kopana hamoho. Zeo libonisa sikamañi kaufela? Li bonisa kuli Krete ni Munyaliwa ba libelezi kukopana. Kona ze li bonisa.

Miluti ye kaufela ni lika zeo libonisa kutaha kwa za niti. Mutalime ka tokomelo, kakuli Ni ya ni liyeha.

¹²⁶ Mi cwale amu lemuhe, mwa hola tuna yani foo sepo kaufela ha ifelile, ya kupila, ba bona Mutu yataha, a zamaya fa mezi, inza ba tahela. Mi taba yateni, ye utwisa butuku, muteeleze hande, taba ye ne ka ba tusa, ne ba i saba. Se bali, “Ku bonahala inge silumba. Sakona kuba sona, mwa ziba, ki sipuku.”

¹²⁷ Haiba zeo ha li si ka ezahala hape! Ba Li saba. Ba saba kunuha, ba saba mufuta wa mata a diabulosi cwalo; kanti Jesu na bulezi kuli Li ka ezahala mwa lizazi le. Nto fela yekona ku ba tusa ki Jesu Kreste. Isiñi kopano isili, isiñi kaufela zona ku likopanya hamoho; zeo likaba fela mwa bumaswe kufita sapili. Nto fela yekona ku mi tusa ki Jesu Kreste.

¹²⁸ Mi ha Na sepisize kukuta mwa mazazi a mafelelezo, mwa mufuta wo, ni kueza ze, kusepisa (kuswana fela inge mwana wa sepiso asika kutela kale ku Abrahama, peu yapili) yona peu ya bulela ya Abrahama, Jesu na ka . . . naize luka bona lika zeswana. Mwana wa sepiso asika taha kale, Mulimu uka iponahalisa Iliyena mwa nama ni kueza zeswana sina Jesu mwa na ezelize, sina mwa Na bulelezi kuli kona mwa Ka ezeza, inge fela mwa na bulelezi kuli kona mo lika bela mwa mazazi a maungulo. Mi fa lisepiso zani kaufela, zelukona ku beya hande fa, ka lipalo za zona, ona fapila mina fa, kuli se si lukela kunga sibaka.

¹²⁹ Mi ni likeleke, ze lukela kuba ni mazoho a kwaluhile, kuli li Li amuhele, “Ni na ni sabo ka Zeo. Ha ki za sikwata sa hesu, mwabona.” Mi ba saba kuba ni Zona. Nto inosi fela yekona bakutisa ku Kreste, ki Kreste Kasibili, mi kanti ba saba bali Sa sabisa. “Oh, Ha ni zibi. Seo ikona kuba silumba, mwa bona. Mi Ha ni zibi ka Sona.” Kusaba nto yekona ku ba tusa.

¹³⁰ Mi ni mwa hola ya lififi yani ya ñalelwa, likeleke ze ketilwe zani, sikwata sani se si inzi kwani, ne li zaba kuli ikona kuba sipuku, ne ba sa tabeli kueza sika ni sona. Mi ki ha kutaha Linzwi le li munati lani, “Mu si ke mwa saba. Ki Na.”

¹³¹ Yena ki yena Linzwi, nji Cwani? [Kopano ili, “Amen.”—Mu.] Ha cinci, kuba Linzwi. Cwale ha mu utwi Linzwi hali bulela, busihu boo kuli, “Wa swana maabani, kacenu, ni kuyakuile. Mu si ke mwa saba; ki Na”? [“Amen.”]

Halu inamiseni litoho zaluna.

¹³² Ndata luna yakwa Lihalimu, ma—ma manzibwana a cisa. Lihola li unsufezi, kuli mane Mulilo so zwile fa aletare. Usweli kububula mwa simu. U ize, “Mubuso uswana sina mutu ya na ngile kanyandi ni kuya kwa nuka, aka cimbeka, ni ku cimbula. Mubuso no swana sina cwalo.” Mulena Mulimu, zazi leliñwi tapi ya mafelelezo yani yeli mwa mezi ani! U ize, “Ne ba sweli mifuta kaufela.” Kanyandi ka Evangeli kani kaswalanga lika za mifuta kaufela; ne ka sweli liñombwe, bonkala, mauiyi, misioka, siyokoyoko. Ha lu zibi ze ka swala, kono nekuna ni litapi zeñwi

mwateni zo No bata. Ki Wena yali Muatuli. Kono lu lemuha kuli, kapili siñombwe, singongi, ni zeñwi kaufela, za kutela kwa liñope hape, kukutela mwa mezi. Kono zazi leliñwi tapi ya mafelelezo yani ye lukisizwe, ye lukiselizwe kutaha, sona siemba sa mafelelezo sani sa Mubili, si ka hohiwa kuzwa mwa lisa lani.

¹³³ No cimbekele kanyandi mwa mazazi a Luther, ni Wesley, Alexander Campbell, John Smith, Calvin, Knox, Finney, Sankey, babañwi cwalo; mwa lusika lwa Pentekota, mazazi abo F. F. Bosworth, ni Frochman, baana ba batuna bani. No cimbekele tunyandi, mazazi abo Billy Sunday, kutaha cwalo mwahala lusika.

¹³⁴ Mi cwale U sa olela mwa lisa. Kana kuna ni alimuñwi wabona yaliteni mo busihu boo, Mulena? Haiba ku cwalo, ha babe sina musali nyana yani fa siliba. Neba mwa buino bwa hae bwa buhule, na sa lemuha kuli ki Wena Mesia. A bona sisupo sani. Ani neli mafelelezo. Ki hali, “Ni lemuha kuli U mupolofita.” Na sina mulelo wa kuli wakona kuba Mesia. Ki hali, “Lu libelezi Mesia,” ka manzwi amañwi. “Lwa ziba Mesia ha ka taha, U ka lu bulelela litaba zee.” Mi Wena wali, “Ki Na luli.” Ani neli mafelelezo.

¹³⁵ Cwale, busihu boo, Mulena, ha ba bone kuli, “Ki Na; mu si ke mwa saba. Ki sepiso ya Ka.” Folisa bakuli, Mulena, pilisa baba latehile, taza babali mukungulu.

¹³⁶ Mi lukone kuya busihu boo, inge lubulela mwa lipilu zaluna, hanze lu ya cwalo, inge bani baba zwa kwa Emausi, “Hanili lipilu zaluna ne li cisa mwahali aluna Hana sweli kuambola ku luna busihu boo mwa muyaho, Kubateni kwa Hae ko Kupahami!” Mo ne ba zibezi kuli neli Wena, ba Ku mema mwandu mi meto abona akwaluha. Mi mañi ni mañi wa luna, busihu boo, a Ku meme ukene. Haiba lu sa Li utwisisi, ha lu Ku meme mwateni, nihakulicwalo. Kona fela mo kona ku Ipatululela ili Wena.

¹³⁷ Mi lu lemuhile mukwa mo No Ipatululezi wena Kasibili kasamulaho wa zuho, Wa eza nto yeñwi mwa mukwa oswana wo No ezeze kaona U si ka kokotelwa kale. Cwale taha busihu boo, Mulena, U bulezi kuli Wena u “yaswana maabani, kacenu, ni kuyakuile.” Lu ezeze, zona hape, sina mo No ezelize mwa mazazi ha No yemi fa mwa nama, fa lifasi. Lu ka ya kwa mandu, luikutwa bubebe mwa lipilu, sina bona. Ka Libizo la Jesu lwa lapela. Amen.

¹³⁸ Cwale mwa sebelezo, busihu boo, Na ziba kuli kwa cisa luli, mi luna ni mizuzu ye mashumi amabeli kuli luzwe ka nako. [Hakuna manzwi fa tepu—Mu.] Nina . . .

¹³⁹ Hani koni kuyemisa kamba kutibela lika ze Ni eza. Ni zamaiswa ki Sesiñwi, Ni bile cwalo kamita, bupilo bwaka kaufela, mi kamita Libanga ze lukile. Ha si si ka ni bulelela kala mafosisa konji ze li mwa Bibebe. Ha ni koni kutuhela.

Hakuna ze ni kona kueza ka sona. Siezanga fela, ona cwalo. Mi Na ziba, haiba Niba ni likute, kuna ni mutu ya tokwa zeo. Mi Ni ka sephala. Mi ka Zazi lani, Ni bata kuli, sina Mulumiwa yomutuna Paulusi ya na ize, “Hakuna mali a mutu mwa mazoho aka.” Huh-uh. Ni—Ni bata ku mi bulelela Niti. Isiñi kuli Nina. . . Na mi lata.

¹⁴⁰ Mi haiba muna ni mushimani yomunyinyani. . . Cwale munahane fateni, kalibe, wena ye Ni omanyize fa nako nyana yefitile, mina likezeli ba milili ye kutilwe ni lika zeñwi. Haiba Ni. . . Haiba u na ni mushimani yomunyinyani ya inzi mwa mukwakwa, mi u bulela kuli, “Junior, mulatiwa, ta kwanu, mulatiwa. Esi mwendi, Ha ni zibi hande bati, ba ka ku hata.” Ha u mulati mwana yoo. Yeo ki niti. U ka ya kwa mukwakwa ni ku mu buha litalo, kamba ku mu hoholola kwateni. Yeo ki niti. Wa mu lata.

¹⁴¹ Kona Evangeli mo iinezi cwalo. Mulimu wa ku lata. “Mi bona Ba lata, Wa shapa ni ku kalimela mwana kaufela ya taha ku Yena.” Ha u sa itiiisi ha u kalimelwa, uzwela fande inge u nyemile, kipeto wa mwa bucwani, ha mu bana ba Mulimu. Kona kuli muhupule fela, ki Mañolo fela kihona.

¹⁴² Cwale linzwi lelizwa ku Yena, linzwi li liliñwi fela, likona kutalusa lika zetuna kufita ze Ni kona kubulela, linako ze milioni. Ki Yena. Lwa ziba sepiso ya Hae. Lwa ziba za Na sepisize kueza. Cwale ha Ni zibi haiba. . . kana. . . lu ka zwa ka. . .

¹⁴³ Kana ufile makadi hape? Kana no file makadi? Neli a cwani? J, ku lukile. Ku lukile, kuli lu buluke nako, ha lu kaleni fela ka nombolo yapili. Cwale, bateni mwendi mwa muyaho wo kaufela. J, nombolo yapili.

¹⁴⁴ Mi cwale luna ni butata nyana. Lu kalezi fa, nako yeñwi, kuzwa yo fa, kufitelela nako, yomuñwi uinezi kwa mulaho, ni fahalihali, kono luna ni bona inge ba filika mwahali mo. Kono batu kaufela baba taha mwahali, zazi ni zazi, bana ni kolo ya kutaha mwa mukoloko. Seo ha si talusi kuli kakuli muna ni kwanu. . .

¹⁴⁵ Ki ba bakai baba ziba, mwa mukopano woo, kubile mwendi buñata habeli ku baba folisizwe inge kwande mwahala sicaba, inge bene ba folisizwe kwanu? Luli, mwa ziba cwalo. Mwabona, kadi ya tapelo yona ki kubeya fela batu hande moo, mubeye Moya o Kenile mwahala bona, sina mo mu twaelezi kuezanga cwalo. Zeo mane ha lu lukeli kuba ni zona cwale. Halukoni ku zwisa fateni makadi a litapelo.

¹⁴⁶ Inge fela mo ne luezelize maabani busihu, ne lusika ba ni makadi a litapelo maabani busihu. Moya o Kenile wa ya mwahala bona bene ba sina makadi a litapelo. Mi Na bona lika zeñata zene Ni si ka bulela sika ka zona, kakuli Ne ni sa zibi kamba ku cwalo kamba nee. Ne ku sa na ni bunsu fahalimwa bona, mi Na li tuhela fela. Ne ni sa zibi. Ne kusike kwaba

hande ku ba biza. Sa bulela Yena kaufela si lukile, kacwalo muteelezange ku Za bulela.

147 Kana ubulezi kuli ki J yeo? J, nombolo yapili? J, nombolo yapili. Ki mañi yana ni kadi ya tapelo yeo? Nanula lizoho la hao. Kubonahala kuli u lifutuzi, mwana ke; mwendi ki babañwi. . . Oh, Mu ni swalele. Oh, ki kwa mulaho koo ya yendamezi kwa limota. Taha kwanu, kalibe. Ba—ba batisanga fela makadi a kwanu cwale, ki mushimani, Muzwale Borders kamba Billy, alimuñwi wabona, linako zeñwi ki bababeli cwalo, ba akopanya kopanya makadi ao fapila mina, ni ku mi tambeka kadi, kaufela se mubata. Ha lu zibangi, ona fela. . . Yo fa wakona kuba ni nombolo yabu faifi, mi *yani* fani una nombolo yabu sebene, *yo* fa unga nombolo yabu fifitini, mi *yani* fani ki ya nainte-faifi, mi ha lu zibangi. Mi cwale, hape, ha Ni taha, Na fela, kaufela ze li fa pilu yaka, kona fo Ni ka bizeza, hakuna taba kamba liinezi kai. Na fela. . . Haiba Ni li. . . Fokuñwi Ni balanga fela babainzi mwa neku li liliñwi, ni kualula ka libaka za lipula mwa neku le kipeto na fumana kalabo. Mwabona? Mi cwale, haiba Ni sa ezi cwalo, kupalañi, Na fela. . . kaufela se si taha mwa munahano waka pili, kona se Ni ka punda.

148 Nombolo yapili. J, nombolo yabubeli. Nombolo yabubeli, nombolo yabulalu, nombolo yane, nombolo yabufaifi, nombolo yabusikisi, sebene, eiti, naini, lishumi, bao ha ba tahe, mwabona. Yapili, yabubeli, yabulalu, yabune, yabufaifi, yabusikisi, yabusebene, yabueiti, yabunaini, yabulishumi. Ki hande. Kona mwa kuezeka cwalo, amutahe cwale. . . Mulibelele, kuna ni yaile kusili. Ne ni sweli. . . Yapili, yabubeli, yabulalu, yabune, yabufaifi, yabusikisi, yabusebene, yabueiti, yabunaini. Ki cona. Cwale, fa, ki ye yabulishumi. Ku lukile.

149 Ilebene, twelufu, setini, foutini, fifitini. Bao ki ba ketalizoho fahalimu. Iliñwi, yabubeli, yabulalu, yabune, yabufaifi. Kihande, zeo ki zende.

150 Sikisitini, sebentini, eitini, naintini, twenti. Iliñwi, yabubeli, yabulalu, yabune. Ni bona fela babane. Twenti, kana twenti ualabile? Ku lukile. Cwale, halulati kuli babañata ba yeme ka nako iliñwi. Cwale haiba lufeza ni bona baa, mi ku sa na ni nako cwalo, lu ka bizeza fateni babañwi. Ha lu bizi. . . Mwendi luka. . .

151 Ha lu likeni babañwi hape. Ha lu likeni baba ketalizoho hape. Twenti-wani kuisa fa twenti-faifi, mwa ma J ona cwalo, ha ba yeme haiba mwakona. Twenti-wani kuisa fa twenti-faifi. Iliñwi, yabubeli, yabulalu, kwa mulaho koo, yabune. Iliñwi, yabubeli, yabulalu, yabune, ao ki afaifi. Lukile, cwale ha lu yemeleñi ona foo. Bao ki ba twenti-faifi mwa mukoloko, mi basweli—basweli kutaha mwa mukoloko wo.

152 Cwale Ni ka mi kupa nto iliñwi. Shangwe ha mu ni teeleeze. . . Mufe Mulimu kutwisiso yamina kaufela, ka mizuzu yetatama ye

fifitini, mizuzu ye sikisitini. Kana mu ka eza cwalo nji? Mi kikuli muka eza cwalo, mukwalule lipilu zamina? Cwale muhupule ze Ni bulezi. Musike mwa li tuhela kuzwa kumina, inge mezi a ngonga fa mukokoto wa pato, sina pulelo ya kale mo ibulelela. Musike mwa eza cwalo. Mutokomele Seo.

¹⁵³ Haiba Ni mu bulelela sika se si siyo mwa Mañolo, ni sepišo ya hola ye, muna ni musebezi wa kubona muina sipula kwanu mi uka to ni bulelela zona. Yeo ki niti. Ha—Ha ni luti lika lisili kwanda Linzwi kihona. Mi haiba Ni ina hande ni Linzwi lani, mi haiba Ni bulela kuli Kona mokuinezi ona cwalo, mi Mulimu. . . Si mwa Bibe. Haiba Lingeloi la Mulena li ni bulelela nto yeñwi ye si yo mwa Bibe, haikoni kuba Lingeloi la Mulena leo. Yeo ki niti. Ali kuba neba nako iliñwi ani bulelele sika sisili kono konji se si li mwa Linzwi, mi mwa paka cwalo. Ha si ka bulela kale nto iliñwi, kuzwa mwahala mianda anda ya likitikiti, ni mishobo ya lifasi, Yeo akile abulela neba nto iliñwi ye fosahalile, kamba kubulela sika kaufela se ne sisi ka ezahala.

¹⁵⁴ Amuteeleze. Mubuze muina sipula ni babañwi kwanu. Lika zemubona fa kaufela, ki mwa bunyinyani fela bwa zona. Kana ki cwalo, mizwale? [Mizwale ba li, “Kiniti.”—Mu.] Kupalañi, kwande koo, ni mwa bupilo bo bupatilwe kaufela, Wa bulelanga, “Zamaya kwa sibaka sa *kuli*, mi ubone se. Mi se si ka ezahala. Mi ubulele se kwa neku le, kulo *fa*.” Zeo fela ki ka tundamo, ka nako kaufela, mwabona, mwaha ni mwaha. Sicaba mwa nyangela si bonanga fela—fela lika zenyinyani. Kono cwale haiba mu kaba ka likute.

¹⁵⁵ Cwale kaufela yaliteni mwa mukoloko wa litapelo wo, ya yemi mo, kuna ni baenyi ku na? Ha mu nanule mazoho a mina. Ku kukukile. Ki babaki kwande koo, baba ziba kuli hakuna ze Ni ziba ka mina? Mu nanule mazoho a mina. Cwale halunze. . . Ni itumezi. Hanina taba kamba uinezi kai, haiba uinzi fa halimu, kwa mulaho koo kwa limota, kutaha cwana *kwanu*, kaufela ko u inzi. Ni ka ba ni. . .

¹⁵⁶ Cwale, ye ki tuso ya mina. Zeo ki kwa bunde bwa mina. Mwabona, zeo ki kwa bunde bwa mina.

¹⁵⁷ Ne ni nahana kuli yo ki muikulyange wa mucaha yana ambola ni na fani, kono ha ki yena. Nina ni muikulu mwahali mo kokuñwi, busihu cwana, wakona kulikana ni yena yoo, mi Ne ni nahana kuli ki yena Paul yani. Yena kamita ubulelanga kuli wa taha, ayeme kwa katala, ani kutaleze kwateni, mi ha si ka kwanisa kale myaha yemibeli ya kupepwa. Ni sepa mushimani yani ubatabata bo mahe.

¹⁵⁸ Kacwalo muhupule, Ni lika ku mi tusa. Ni. . . Mulimu wa ziba cwalo. Ni lika ku mi tusa, mwabona. Cwale amutalime, Ni bata kuli mufumane tuso, haiba Yena ataha mwahala luna.

¹⁵⁹ Cwale munahane ka zona, yena Mutu wa Jesu Krete ya beleka mwa nama, inge mwa Na sepišelize kuli Uka eza mwa

maungulo. Ki ba bakai ba ba ziba kuli Na sepisize cwalo? [Kopano ili, "Amen."—Mu.] Inge fela mo ne kubezi kwa Sodoma kwani, fani Lingeloi ni mukokoto wa Lona ha ne li fulalezi, mi ni . . . Yani neli Mulimu. Kana mwa lumela kuli neli Mulimu yani? Ki ba bakai baba lumela kuli yani neli Mulimu? ["Amen."] Luli, neli yena. Bibebe ibulezi ona cwalo. M Yena, Jesu, na bapanyize ku sona. Cwale mulemuhe.

¹⁶⁰ Cwale mina fande foo babana ni kadi ya tapelo, Ni bata kuli mu ni ezeze nto yeñwi, semuli sona kaufela. Cwale muhupule, lika ze, mutalime Ha li mi bulelela kuli mu folisizwe, kamba kaufela se Li mi bulelela kueza. Mutalime se Li bulela. Haiba Li mi bulelela fela, kipeto zeo ki za kuyaha tumelo ya mina. Mi kipeto tumelo ya mina itaha fa sibaka, mu ka otoloha fela ni kuamuhela Mulimu. Ha ki na, kakuli Ndate wa Lihalimu wa ziba.

¹⁶¹ Ni talima fafasi neku le mo, Ha ni boni neba mutu alimuñwi ye Ni ziba. Hakuna bo ni bona kwanda bababeli kamba babalalu mwa sicaba, kona bo Ni ziba. Mi ha Ni zibi sina, ona fa, Na kona kubulela, kubonisa alimuñwi. Ni ziba kuli Edmund Way naliteni mo mizuzu nyana yefitile. Ne ni hupula kuli Ni mu boni, mi Ni—Ni mu tondile . . .

¹⁶² Haiba ha Ni si ka lyanganeha, Ni bona ye Ni ziba, ki muuna ni musala hae, ni musizana yomunyinyani, yabizwa Fritzinger, yazwa kwa Ohio. Kana yo, ki wena Muzwa- . . . *yani* ki Muzwale Fritzinger? U inezi kwa lilulu koo . . . Yani ki Muzwale ni Kezeli Fritzinger, yazwa kwa Ohio, balikani baka.

¹⁶³ Mi kwande a zeo, yainezi kwa mulaho kwani, ki mu . . . Ni bona kwa neku le, kuna ni muuna muhulu wa myaha ye naintetuu ya kupepwa, wa libizo la William Dauch. Yena ni musala hae. Ki nasi. William Dauch, mwa Ohio, ki mulikana ka luli ya ni paka. Ha ki kale hahulu, nana ni, myaha ye nainte-wani ya kupepwa, na katazwa ki pilu, pilu neipalelwa kubeleka hande, mi musala hae ani biza, kuli ni ye teñi kapili, na shwa ona fani. Mi cwale . . .

¹⁶⁴ U bile mulikani kuna luli. Fa musipili waka ha ni yo mu lekula, Ne ni bilaela. Mi Na yema, leliñwi la mawili aka la zwa mwa swanelo, neli pazaula fela taya yaka, mi Na ya fa sitishini sa Texaco, na beisa mafula, mi ba zwela fande, ku to i talima. Mi ha Ni inula meto, Na bona Muzwale Dauch inza zamaya kukena mwa keleke yaka, ato ni swala mwa lizoho. Na li, "Kulumbwe Mulena." Mi Na talima kwa mulaho neku le, mi ki yo utaha mwa mukwakwa, mi ato ni swala mwa lizoho. Mi Na ya ku yena.

¹⁶⁵ Ne ni boni dokota wa hae, Mujuda wa mucaha, kamba muuna wa lilimo za bunca, muuna wa Mujuda. Mi Na li, "U cwani muuna yo, dokota?"

166 Ali, “Mane haana neba kolo ya kubuyela.” Ali, “U beilwe kwa okisijini.” Ali, “U ka shwela ona kwani.” Ki hali, “Hupula, una ni myaha ye nainte-wani wa kupepwa.”

Se nili, “Eeni, sha.”

167 Ali, “Ki butuku bobu maswe bwa pilu. Hakuna zekona kuezahala.” Ali, “Ki nako ya kuli afunduke.”

168 Mi Na li, “Eni, sha. Kono, batili, ha na kufunduka. Kona ona cwalo.”

169 Na kena mwahali, na shelisa lizoho laka mwa tende ya okisijini yani. Na li, “Muzwale Dauch, wa ni utwa nji?” A ni talima. Cwale luli, ka libizo la hae, ki mu German, D-a-u-g-h, mi Ni li bizanga kuli Dauch, mwabona. Mi Na—mi Na beya lizoho laka mwatasa tende, mi Na li, “Wa ni utwa, Muzwale Dauch?”

Ki hali, “Eehe.”

Na li, “Ha u funduki. Ni kuboni kale kuli ha u funduki.”

170 Sunda kuzwa fani, ne ni yemi mwa keleke yaka, kimañi yataha inza zamaya kukena mwa keleke yani haisi Muzwale Dauch! Na zwa mwa mukopano mi naya kwa nuka, ko ku lekiswa lico ku yo ca. Mi Ha ni zwa mwa mota, inge ni zamaya mwa mukwakwa, ha ki yo yataha Muzwale Dauch ni lizoho lali kuotolola. Lipono zani ha li palelwangi.

171 Mi muuna yani wa myaha ye nainte-wani ya kupepwa, mi ulatelela mukoipano kaufela, naliteni mwa California. Nanula fela lizoho la hao, Muzwale Dauch? uinezi fani, kuli batu ba bone musole wa niti yaliteni cwale. Kiyo, uinezi fa, mwabona, myaha ye nainte-wani ya kupepwa, kono ulatelela mwa mukopano kaufela. Mi ha Ni li kwa tabernakele, ukobocanga limaili ze mianda anda zazi ni zazi, ku to ni utwa ha ni kutaza bulumiwa nyana, ni kukuta. Mulimu, “Ku kaba Liseli ka nako ya manzibwana.”

172 Na li, zazi leliñwi hane Ni ambola ni yena, Na li, “Ni ku ezeze sikamañi, Muzwale Dauch?”

173 “Kupo iliñwi fela, Muzwale Branham. Nako Ya taha, Ni bata kuya ni Yena.”

174 Nali, “Usike wa bilaela. Zeo lilukisizwe kale. Luli.” Cwale, Muuna yo akena mwahali, mi akolobezwa, oh, akena a amuhela kolobezo ya Moya o Kenile ni lika kaufela, ki mutanga yomunde wa Kreste.

175 Cwale Ni ka kupa mañi ni mañi, mube ka likute hande, mutalime neku le mi mulapele.

176 Cwale ki baluti ba bakai mo baba ziba kuli ki Yena Muprisita Yomuhulu, onafa cwale, yakona ku swaliwa ka maikuto a matuku aluna? [Puteho ili, “Amen.”—Mu.] Kihande, haiba Wa swana maabani, kacenu, ni kuyakuile, mi ki Muprisita Yomutuna yaswana, Ulukela kueza ka nzila yeswana. Fela, Yena, mubili wa

Hae u inzi fa . . . fa Lubona lwa Mulimu. Ki ba bakai baba ziba cwalo? ["Amen."] Mubili wa Jesu u fa Lubona lwa Mulimu. Kono U itusisa mubili wa luna ku bonahalela mwateni yena Kasibili, inge fela mwa Na sepiselize kuezeza. "Misebezi ye Ni eza mu ka i eza ni mina."

Ni ka mi kupa kuli muine mukuzize, ka likute, mutone, mulapele.

¹⁷⁷ Cwale, Ndata luna yakwa Lihalimu, Ni likile kuba ka likute fela mo Ni zibela, ka zona. Cwale linzwi fela lelizwa ku Wena cwale, Mulena, mi cwale kipeto, Linzwi lelisani litulukele mwahala sicaba se mi libulele kuli, "Ki Na; mu si ke mwa saba." Lumeleza cwalo, Ndate. Mi Ni ipa ili na ku Wena, ni Liñusa le li kutalizwe bushu boo, ni Linzwi la Hao kuli li pakiwe. Ha u lukeli ku li eza. Kono haiba U ka lieza, kamba U ka eza kueza, kakuli U sepisize kueza cwalo. Ni lapela kuli U alabe ze, ka Libizo la Jesu. Amen.

¹⁷⁸ Mi mañi ni mañi mube fela ka likute cwale, ka likute luli handende. Mu ikutwa cwani? Ni ka mifa Liñolo hanze lu ya. Haiba Mulena aeza, Ha ni zibi. Kono fe- . . . Mi Ni bile ni kutazanga ona cwalo, mwabona, yeo ki iliñwi ya tozo. Ye ki tozo ya mufuta usili. Yani neli fela mbuyoti. Ye, nto iliñwi fela, izwisa fela bupilo ku wena.

¹⁷⁹ Cwale kalibe uyemi fa. Na likuba ni mubone fateni mwa bupilo bwaka. Kana lu baenyi nji? Na lumela ubulezi cwalo, fa nako nyana yefitile, Ne ni si ka kuziba. Mulimu wa kub ziba. Wa ni ziba. Kana wa ziba ze lu yemezi fa cwale, lu ka yo ikalabela zona ka Lizazi la Katulo? [Kezeli uli, "Amen."—Mu.] Wa ziba cwalo? U ziba kuli ze lueza cwale, Mulimu uka yo lu yemiseza ku ikalabela zona kwani? Ni bulezi fela seo ka mulelo. Cwale, haiba Mulena Jesu uka patulula ku na so sweli kueza, sesili mwa munahano wa hao, kamba nto yecwalo, kikuli uka lumela? Uka tokwa kulumela cwalo, nji cwani? ["Amen."]

¹⁸⁰ Kana mu ka lumela kwande koo, mina sicaba? [Kopano ili, "Amen."—Mu.]

¹⁸¹ Cwale lu yemi inge musali yani fa siliba, ni Mulen'a luna, muuna ni musali ba kopana ka nako ya pili. Mwabona? Ki luna ba fa, kukopana ka . . . Yeo ki Muñoli Joani kauhanyo ya 4. Cwale haiba Moya o Kenile uka li . . . Haiba utezi kwanu bakeñisa mutu usili, haiba wa kula, haiba ki butata bwa mwa ndu, haiba ki butata bwa masheleñi, seo sili sona kaufela, Na hakuna ze ni ziba. Kono Yena wa ziba. Kono Wa kona kulemuha milelo ye li mwa pilu ya hao. Yena kiyena Linzwi. Ha ni koni. Ni mutu. Wena u ikalezwi nyana fela, mi leo kona libaka ha Ni eza se, wa bona.

¹⁸² Yeo ki iliñwi ya matata a hao, ki kuikalelwa. Yeo ki niti. Mi hape una ni butuku bwa dayabitisi, yeo ki nto yeñwi yeliteni ku wena. Yeo ki niti. Matata, lika zeñata fela li fosahalile. Kana ku cwalo? Haiba ku cwalo, nanula lizoho la hao. Mwabona? Kana

u lumela kuli Uka ku folisa? [Kezeli uli, “Na lumela.”—Mu.] Wa lumela? Cwale, kuikalelwa kwa hao kutahile ka siyemo sa hao, wabona, kono cwale zeo kaufela li ka ku siya. Mi Ni lumela kuli ka tumelo lu kaya kwa Kalvari, lube ni kufiwa Mali amanca.

¹⁸³ Cwale, zeo kona fela za Na ezize. Na bulelezi musali fa siliba butata bwa hae. Yena butata neli baana babañata. Za hao neli sikamañi. . . Ni sepa neli kuikalelwa, ni zepeli kamba zetalu cwalo kona ze ne fosahalile ni wena. Yeo ki niti, nji cwani? Yeo ki nto yeswana.

¹⁸⁴ Cwale, ha Na tile ku Simoni, Na mu bulelezi yoo nali yena. U lumela kuli Mulimu ukona ku ni bulelela libizo la hao? Kana si ka kutusa ku lumela hahulu? Si ka kutusa? Musala bo. Strong. . . [Kezeli uli, “Stout.”—Mu.] Stout, kana uka lumela? Zamaya mi ulumele, mi uka. . . Ku felile. Amen.

¹⁸⁵ Taha. Wa lumela? Nina ni muenyi ku wena hape. Ha ni ku zibi. Mulimu wa kuziba. Kana u lumela kuli Wa kona kupatulula kuna butata bwa haoi? Mi haiba Aeza cwalo, kipeto Mulena Mulimu a lumbekwe. Kana ku cwalo nji? [Kezeli uli, “Eeni, ki niti.”—Mu.] Cwale musike—musike mwa bilaela, mwabona, zeo—zeo ki Yena, kona ha u ikutwa cwalo. Ku lukile. Ni wena hape ukatazwa ki buino bwa kuikalelwa, kusaba booko ha buiketi, mi katala katala fela kapili. Hape ukatazaha ni sinya, kuna ni se si fosahalile kwa liswafu, mi ukatazwa ki kutokwa mali. Yeo ki niti. Una ni sesiñwi. . .

¹⁸⁶ Ki muuna yahanelezi kutahanga fa. Kana u lumela kuli Mulimu wakona ku kufolisa? [Kezeli uli, “Eeni, Na lumela.”—Mu.] Afolise ni muuna hao, hape, amu folise? U nanaha kuli butuku bwa mwa mba bu ka fela, mi abe fela hande? Kona zwa sweli kukula. Zamaya u mu beye mazoho, mu bulelele cwalo, mi lika—lika mu siya.

¹⁸⁷ Ni muenyi ku wena. Mulena Jesu u ziba bubeli bwa luna, nji Cwani? Naa ulumela kuli Mulimu uta ku folisa? Haiba Mulena Jesu uka ni patululela taba yeli. . . yeo wena. . . yeli mwa pilu ya hao, kana u lumela kuli Uka ku folisa? U bile ni matata. Una ni—ni—ni butata sinya, ka nto iliñwi. Mi nto yeñwi, itislice siinya sa hao kuba ni sitombo, kono zeo kona za bulezi dokota wa hao. Cwale, nto yeñwi ki, kuli babata ku yo pazula. Yeo luli ki niti. Nji cwani? Cwale kana ulumela kuli Wakona ku fitelela zeo? Unahana kuli tumelo ya hao i ku Yena? Cwale u ziba yoo ha ki na yasweli kuezza zeo. Wa lumela? Ku lukile. Zamaya, mi sina ha u lumela, ku be ona cwalo kuwena.

¹⁸⁸ Lu baenyi ku mañi ni mañi, Na sepa. Mulena Mulimu ziba bubeli bwa luna. Kana wa lumela kuli Wakona ku patulula ku na litaba ze ka ku tusa? [Kezeli uli, “Eni, Ni ziba cwalo.”—Mu.] Wa, wa lumela Uka eza cwalo. [“Hahulu.”] Ni li. . . “Hahulu,” yeo ki yende luli. Ki hande luli. Cwale una ni lika zeñata ze fosahalile ku wena, ki matata amañata ñata ni litaba zeñwi, ni sihotolwa

cwalo, mi haukoni kufola kusona. Mi una ni kuikalelwa luli luli. Mi—mi yeo, yeo ki niti.

¹⁸⁹ Mi, una ni mutiyo fa pilu ya hao, mi mutiyo wo ki wa mutu yomuñwi, yoo ki mwana hao wa mucaha. Mi una ni—ni butata, butata bwa mwa lapa. Yena ni musala hae, ba hanelezi hahulu ku omananga ni mifilifili . . . ? . . . Mi wena ubilaezwa ka zona. Ki cwalo. Cwale ulumele ka pilu ya hao kaufela, mi kaufela li ka fela ni ku iconga. U lumele cwale. Mulena aku fuyole.

¹⁹⁰ Cwale wa lumela, muñaka? Ni muenyi ku wena, mi—mi u muenyi kuna niwena. Mi ki—ki lukale . . . Lipono cwale, Na bona, kubonahala inge kuli ndu kaufela ikala fela kuba busweu, inge kakundukundu kaka pikuluha cwalo. Mwabona? Kono kana u lumela kuli Mulena Jesu uka patulula ku nazo yemezo foo? U lumela kuli Uka patulula? Na lumela cwalo, nina. Ni ambola fela ku wena, kuli ni swale moya wa hao, kona ze Ni sweli kuezeza zeo. Mwabona, Ha ni ku zibi, kona kuli ilukela kuba nto isili kwand'a na yaeza cwalo. Ni lukela kuzwa fateni na kasibili, kuli Yena lipete yena Kasibili. Wa utwisisa?

¹⁹¹ Cwale, nto iliñwi, u katazwa ki buino bwa kuikalelwa hahulu, mi kuikalelwa koo kubile fa nako yetelele cwale. Yeo ki niti. [Muzwale uli, “Yeo ki niti.”—Mu.] Mi kuikalelwa koo ku kutiselize kumata mali hahulu, hape. Mi u bile ni sitiroko. [“Ki niti.”] Kona cwalo. Kuli, ukana waba mukutazi, kamba u mukutazi. [“Ni mukutazi.”] Cwale u mukutazi; Ni kuboni unzo yemi fa katala. Mi, ube ni tumelo ku Mulimu, mi kuikalelwa koo ku ka kusiya. Bakutazi kaufela bana ni ze cwalo. Ukaba fela hande. Kuta kwa katala ka hao, mi u utwele Mulimu mi upile ka niti kwa Linzwi leo, Jesu Kreste.

¹⁹² U lumela kuli butata bwa mukokoto wa hao bu felile, ha no sa inzi mwa sipula? Kana wa lumela? [Kezeli uli, “Eeni.”—Mu.] Ku lukile, sha, kona kuli zwelapili fela uzamaye, ubulela kuli “Ni Itumezi, Mulena.”

¹⁹³ Taha, kalibe. U ikutwa cwani? U ni lumela kuba mutang'a Hae? [Kezeli uli, “Luli nalumela.”—Mu.] Ku lukile. U lumela kuli butata bwa sisali bo, butata bwa sisali, bu ka ku siya? [“Amen.”] Wa lumela? Kipeto zamaya, ubulela kuli, “Ni Itumezi, Mulena.”

¹⁹⁴ Butata bwa lipiyo, butata bwa mukokoto, mwa moongola wa hao. Kana ulumela kuli Mulimu uka ku folisa a kueze hande, ku zeo? U lumela kuli Uka ku folisa? Ku lukile, zwelapili ku za hao . . . ? . . .

¹⁹⁵ Taha, kalibe. Ni muenyi ku wena. Haiba Ni sa buleli sika ku wena, neba silisiñwi, kikuli uka lumela kuli Pata ya Mulimu iteni mo ku folisa bakuli? [Kezeli uli, “Kaniti, Na lumela.”—Mu.] Wa lumela? Kihande, haiba u lumela, butata bwa hao mwa mba . . . Ni ku bulelezi kale, wa bona. Bu—bu ile. Ni ku bulelezi, wabona. [“Kulumbwe Mulimu! Oh, ni Itumezi, Jesu.”]

¹⁹⁶ U ikutwa cwani, muñaka? Mulimu upila mwa pilu. Mi pilu ya hao ibile ibonisa fa, ifenyehile. Kikuli ulumela kuli Uka i eza hande? Ikele mwa musipili mi ulumele ona cwalo. Mulimu aku fuyole. Wa lumela; U ka i eza hande.

¹⁹⁷ Wa ikalelwa, mane konji haubile ni butata bwa mwa mba, litombo za mwa mba. Za ku katazanga usafeza fela kuca. Wa lumela kuli lifelile kaufela cwale? Zamaya i cele kaufela zobata.

¹⁹⁸ Kubanga butata nyana kuli unanuhe, mukokoto u bile u ku kataza maswe maswe. [Mukuli uli, “Eeni, sha.”—Mu.] Hauna ku ku kataza hape, haiba u lumela. Wa lumela? [“Eeni, sha.”] Ku lukile, ikele muuna, mi Mulena Jesu aku folise kufelelela.

¹⁹⁹ Kiñi zo ikalezwi maswe cwana? Zwelapili fela, uli, “Hanisana kuba ni kuikalelwa fateni,” mi hauna kuba cwalo. Zamaya mi ulumele. Ku likile, sha.

²⁰⁰ Taha, kalibe. Cwale, musali wa kwa Ethiopia, ni muuna wa mukuwa, inge nto yeñwi fela yene fumanwi ka zazi lani, Jesu. Nebana ni saluluti inge mo ne ba belanga ni yona kwa Mboela, kono ha lu sana zeo cwale. Jesu na ba zibisize kuli bani ki batu ba Mulimu. Nekusina shutano, mwabona, kamba nali Mujuda kamba Musamaria.

²⁰¹ Cwale, haiba Mulimu ha ku tusi, cwanoñu fa butuku bwa kuopa mwa lingongo boo bu ka ku bisa sihole. Kono kana u lumela kuli U ka ku tusa, a ku eze hande? Inge fela musali mwa na bezi, ikele mwa musipili mi ubulelele batu lika zetuna za kuezelize Mulimu. Ku lukile.

Cwale, kunani dokota waza kupazula ya libelezi kulongola tipa ya hae.

²⁰² Fa nako nyana fela. Ne si musali yoo. Cwale, fa nako nyana fela, mañi ni mañi mube ka likute cwale. Ki—ki Satani, yalikile kueza nto yeñwi. Ki ye fa. Sitombo, sitombo sa kansa, bubeli bwa mina. Yeo ki niti. Una ni kansa, ni yena una ni kansa, mi diabulosi yani usweli kuhuwa kubata tuso. Kono Moya o Kenile wa huwa, ni ona. U ka lumela mañi, Yena? Ku lukile. Nanuha mwa kambeta kao kalibe. Nanuha fa bulobalo bwa hao bo. Zwa fateni foo, mi ulumele. Zamaya, u Mu lumele cwale. Amen.

²⁰³ Kana mwa lumela? Lika kaufela za konahala. Kana mwa lumela? Kucwani he mina mwahala sicaba? [Kopano ni baba sa zo foliswa ba nyakalala kaufela—Mu.]

²⁰⁴ Ha lu yemeñi cwale. Ona fa kona nako ya kueza zeo. Mi mutu kaufela . . . Mulimu ami fuyole. Mutu kaufela cwale ayeme cwale. Kaufe Mulimu milumbeko. Amu nanule mazoho a mina.

²⁰⁵ Ni Itumezi, Mulena Jesu! Lwa Ku lumba ka butuna bwa Hao, ni foliso ya Hao kwa bakuli. [Kopano ya nyakalala—Mu.] 

BUPAKI FA LIWATE LOZ64-0307

(A Testimony On The Sea)

Liñusa le ka Muzwale William Marrion Branham, neli kutalizwe lwa pili mwa Sikuwa la Pelekelo manzibwana, Liatamanyi 7, 1964 ili kwa Soul's Harbor Temple mwa Dallas, Texas, U.S.A., iingilwe kuzwa fa tepu ya magesi ya manzwi ni ku hatisiwa kusina kuzusa sika mwa teni kuya Sikuwa. Toloko ye ya mwa Silozi nei hatizizwe ni ku hasanyiwa kiba Voice Of God Recordings.

LOZI

©2021 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org

Zibiso ya bahatisi

Litukelo kaufela li bulukilwe. Buka ye yakona kupulintwa fa pulinta ya mwa ndu kuli iitisiswe ki mutu kamba kuli ifiwe ku yomnwi, mahala feela, kakuba siituiso sa ku hasanya Evangeli ya Jesu Krete. Buka ye hailekisiwi, kuatiswa mwa buñata, ku nepelwa fa moya wa webusaiti, ku bulukwa mwa mukwa wo bunolo, ku tolokwa mwa mishobo isili, kamba ku itusiswa kwa kukupa mashelēni ku sina tumelelano niba Voice Of God Recordings®.

Ka litaba zeñata kamba ka libuka zeñwi ze liteni, shangwe muñolele kwa:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org